

宋

史

八七

史20

905992

列傳卷第五十六

宋史二百九十七

開儀回司上精鑿國事而著者丞相樞密領經筵事都總裁等奉

勅修書吹籥崇詰百再墨太常制士章燭太

孔道輔

子宗翰

鞠詠

劉隨

曹修古

郭勸

段少連

孔道輔字原魯初名延魯孔子四十五代孫也父勛  
進士及第爲太平州推官以殿中丞通判廣州會真  
宗東封躬詣孔子祠帝問宰相孔氏今孰爲名者或  
言最有治行即召對以爲太常博士知曲阜縣初勛  
在廣州以清潔聞及被召蕃酋爭持寶貨以獻皆慰

四百五十七  
遣之後爲御史臺推直官累遷秘書監分司南京管  
勾祖廟以尚書工部侍郎致仕後道輔卒年八十九  
道輔幼端重舉進士第爲寧州軍事推官數與州將  
爭事有蛇出天慶觀真武殿中一郡以爲神州將帥  
官屬徃奠拜之欲上其事道輔徑前以笏擊蛇碎其  
首觀者初驚後莫不歎服遷大理寺丞知仙源縣主  
孔子祠事孔氏故多放縱者道輔一繩以法上言廟  
制庫陋請加脩崇詔可再遷太常博士章獻太后臨  
朝召爲左正言受命日論奏樞密使曹利用尚御藥  
羅崇勲竊弄威柄宜早斥去以清朝廷立對移刻太

后可其言乃退未幾爲直史館判三司理欠憑由司  
奉使契丹道除右司諫龍圖閣待制契丹宴使者優  
人以文宣王爲戲道輔艷然徑出契丹使主客者邀  
道輔還坐且令謝之道輔正色曰中國與北朝通好  
以禮文相接今俳優之徒慢侮先聖而不之禁北朝  
之過也道輔何謝契丹君臣默然又酌大卮謂曰方  
天寒飲此可以致和氣道輔曰不和固無害旣還言  
者以爲生事且開爭端仁宗問其故對曰契丹比爲  
黑水所破勢甚蹙平時漢使至契丹輒爲所侮若不  
較恐益慢中國帝然之歷判吏部流內銓糾察在京

刑獄坐糾事不當出知鄆州徙青州還判流內銓遷  
尚書兵部員外郎復出知徐許二州徙應天府明道  
二年召爲右諫議大夫權御史中丞會郭皇后廢道  
輔率諫官孫祖德范仲淹宋郊劉渙御史蔣堂郭勸  
楊偕馬絳段少連十人詣垂拱殿伏奏皇后天下之  
母不當輕議絀廢願賜對盡所言帝使內侍諭道輔  
等至中書令宰相呂夷簡以皇后當廢狀告之道輔  
語夷簡曰大臣之於帝后猶子事父母也父母不和  
可以諫止柰何順父出母乎夷簡曰廢后有漢唐故事  
道輔復曰人臣當道君以堯舜豈得引漢唐失德爲

法邪夷簡不荅即奏言伏閣請對非太平美事於是  
出道輔知泰州明日晨入至待漏聞有詔亟馳出城  
頃之徙徐州又徙兗州進龍圖閣直學士遷給事中  
在兗三年復入爲御史中丞道輔性鯁挺特達遇事  
彈劾無所避出入風采肅然及再執憲權貴益忌之  
初道輔與其父里中僦郭贄舊宅居之有言於帝者  
曰道輔家近太廟出入傳呼非所以尊神明即詔道  
輔他徙集賢校理張宗古上言漢內史府在太廟垣  
垣中國朝以來廟垣下皆有官私第舍謂不須避帝  
出宗古通判萊州道輔歎曰儉人之言入矣會受詔

鞠馮士元獄事連參知政事程琳宰相張士遜素惡琳而疾道輔不附已將逐之察帝有不悅琳意即謂道輔上顧程公厚今為小人所誣見上為辨之道輔入對言琳罪薄不足深治帝果怒以道輔朋黨大臣出知鄆州已而道輔知為士遜所賣頗憤惋時大寒上道行至韋城發病卒天下莫不以直道許之皇祐三年王素因對語及道輔仁宗思其忠特贈尚書工部侍郎子宗翰

宗翰字周翰登進士第知仙源縣而為治有條理遇族人有恩不以私故翫法王珪司馬光皆上章論薦

由通判陵州爲夔峽轉運判官提點京東刑獄知虔  
州城濱章貢兩江歲爲水齧宗翰伐石爲址治鐵錮  
之由是屹然詔書褒美歷陝楊洪兗州皆以治聞哲  
宗初立求言吏民上書以千數詔司馬光采閱其可  
用者十五人獨稱獎其二乃宗翰與王鞏也元祐初  
召爲司農少卿遷鴻臚卿言孔子之後自漢以來有  
褒成奉聖宗聖之號皆賜實封或繅帛以奉先祀至  
于國朝益加崇禮真宗東封臨幸賜子孫世襲公爵  
然兼領他官不在故郡於名爲不正請自今襲封之  
人使終身在鄉里詔改衍聖公爲奉聖公不領他職



三百八十八  
給廟學田萬畝賜國子監書立學官以誨其子弟進  
刑部侍郎屬疾求去以寶文閣待制知徐州未拜而  
卒

鞠詠字詠之開封人父勵尚書膳部員外郎廣南轉  
運使詠十歲而孤好學自立舉進士試秘書省校書  
郎知錢塘縣改著作郎知山陰縣仁宗即位以太常  
博士召爲監察御史錢惟演自亳州來朝圖入相詠  
言惟演儉險嘗與丁謂爲婚姻緣此大用後揣知謂  
奸狀已萌懼牽連得禍因此力攻謂今若遂以爲相  
必大失天下望太后遣內侍持奏示之惟演猶顧望

不行詠語諫官劉隨曰若相惟演當取白麻廷毀之  
惟演聞乃亟去大安殿柱生芝草召群臣就觀詠言  
陛下新即位河決未塞霖雨害稼宜思所以應災變  
臣願陛下以援進忠良退斥邪佞爲國寶以訓勸矣  
農豐積倉廩爲天瑞草木之怪何足尚哉時王欽若  
復相詠嫉欽若阿倚數睥睨其短欽若心忌之會詠  
兼左述使率府率崇俊入朝失儀詠言崇俊必在邊  
今老矣此不足罪欽若奏詠廢朝廷儀出通判信州  
又坐鞠陳絳獄失實徙邵州欽若卒御史中丞王臻  
奏還詠殿中侍御史爲三司鹽鐵判官曹利用貶死

利用嘗所薦擢者多領兵守邊朝廷欲罷去之詠請一切毋治天聖六年夏大星晝隕有聲如雷詠條五事上之因言太子少保致仕晁迥雖老而有器識宜蒙訪對其必有補又言三司使胡則丁謂黨也性貪巧不可任利權河北京師旱饑奏請出太倉米十萬石振饑民江淮制置使鍾離瑾因奏計多致東南物以賂權貴詠請御史臺劾狀帝面諭瑾亟還所部以尚書禮部員外郎兼侍御史知雜事權同判吏部流內銓爲三司鹽鐵副使八年特置天章閣待制以詠及范諷爲之判登聞檢院定國軍節度使張士遜入

覲冀得再用詠奏曰曹利用擅威福士遜與之共事  
相親厚援薦以至相位陛下以東宮僚屬用之臣願  
割舊恩伸公義趣使之藩士遜乃赴鎮明年詠卒嘗  
著道釋雜言數十篇別構淨室以居自號深寧子

劉隨字仲豫開封考城人以進士及第爲永康軍判  
官軍無城堞每伐巨木爲柵壞輒以他木易之頗用  
民力隨因令環植楊柳數十萬株使相連屬以爲限  
界民遂得不擾屬縣令受賕鬻獄轉運使李士衡託  
令於隨不從士衡憤怒乃奏隨苛刻不堪從政罷歸  
不得調初西南夷市馬入官苦吏誅索隨爲繩按之

既罷夷人數百訴於轉運使曰吾父何在事聞乃得  
調後改大理寺丞爲詳斷官李溥以贓敗事連權貴  
有司希旨不窮治隨請再劾之卒抵溥罪晁迥薦通  
判益州呂夷簡安撫川峽又言其材以太常博士改  
右正言數月坐嘗爲開封府發解逃捕官而不察舉  
人私以策辭相授降監濟州稅稍徙通判晉州還朝  
遷右司諫爲三司戶部判官隨在諫職數言事嘗言  
今之所切在於納諫其餘守常安靖而已又奏頻年  
水旱咎在執事大臣忿爭不和請察王欽若等所爭  
爲辨曲直又因星變言國家本支蕃衍而安定王之

外封策未行望擇賢者用唐故事增廣嗣王郡王之  
封以慰祖宗意時下詔蜀中選優人補教坊隨以爲  
賤工不足辱詔書又劾奏江淮發運使鍾離瑾載竒  
花怪石數十艘納禁中及賂權貴累疏論丁謂姦邪  
不宜還之內地胡則謂之黨旣以罪出陳州不當復  
進職王欽若旣死詔塑其像茅山列於仙官隨言欽  
若賊汚無忌憚考其行豈神仙耶宜察其妄又言李  
維以詞臣求換武職非所以勵廉節前後所論甚衆  
帝旣益習天下事而太后猶未歸政隨請軍國常務  
專稟帝旨又諫太后不宜數幸外家太后不悅會隨

請外出知濟州政起居卽久之遷尚書刑部員外卽  
入兼侍御史知雜事上言比年庶官佞倖請託或對  
見之際涕泗析恩或績效甚微術鬻要賞亦有藩翰  
之臣位尊職重表章不遜請求靡厭按察之司燕安  
顧望以容奸爲大體以舉職爲近名以巧詐爲賢以  
恬退爲拙以至貪殘者瀆于貨財老疾者不知止足  
請行申儆之法朝廷爲下詔戒中外未幾權同判吏  
部流內銓以長定格從事吏不得爲奸改三司鹽鐵  
副使使契丹以病足痺辭不能拜及還爲有司劾奏  
奪一官出知信州徙宜州再遷工部卽中知應天府

召為戶部副使改天闈待制不旬日卒隨與孔道輔  
曹修古同時為言事官皆以清直聞隨臨事明銳敢  
行在蜀人號為水晶燈籠初使契丹還會貶而官收  
所得馬十五乘既卒帝憐其家貧賜錢六十萬  
曹修古字述之建州建安人進士起家累遷秘書丞  
同判饒州宋綬薦其材召還以太常博士為監察御  
史上四事曰行法令審故事惜材力辨忠邪辭甚切  
至又奏唐貞觀中嘗下詔令致仕官班本品見任上  
欲其知恥而勇退也比有年餘八十尚任班行心力  
既衰官事何補請下有司敕文武官年及七十上書



自言特與遷官致仕仍從貞觀舊制即宿德勲賢自  
如故事因著為令修古嘗偕三院御史十二人晨朝  
將至朝堂黃門二人行馬不避呵者止之反為所詈  
修古奏前史稱御史臺尊則天子尊故事三院同行  
與知雜事同今黃門侮慢若此請付所司劾治帝聞  
立命笞之晏殊以笏擊人折齒修古奏殊身任輔弼  
百僚所法而忿躁亡大臣體古者三公不按吏先朝  
陳恕於中書榜人即時罷黜請正典刑以允公議司  
天監主簿苗舜臣等嘗言土宿留參太白晝見詔日  
官同考定及奏以謂土宿留參順不相犯太白晝見

日未過午舜臣等坐妄言災變被罰修古奏言日官所定希旨悅上未足爲信今罰舜臣等其事甚小然恐人人自此畏避佞媚取容以災爲福天變不告所損至大禁中以翡翠羽爲服玩詔市於南越修古以謂重傷物命且真宗時嘗禁採絨毛故事未遠命罷之時頗崇建塔廟議營金閣費不可勝計修古極陳其不可久之出知歙州徙南劔州復爲開封府判官歷殿中侍御史擢尚書刑部員外郎知雜司事權同判吏部流內銓未踰月會太后兄子劉從德死錄其姻戚至於厮役幾八十人龍圖閣直學士馬季良集

賢校理錢暖皆緣遺奏超授官秩修古與揚偕郭勸  
段少連交章論列太后怒下其章中書大臣請黜修  
古知衢州餘以次貶太后以爲責輕命皆削一官以  
修古爲工部員外郎同判杭州未行改知興化軍會  
赦復官卒修古立朝慷慨有風節當太后臨朝權倖  
用事人人顧望畏忌而修古遇事輒言無所回撓既  
没人多惜之家貧不能歸葬賓佐賻錢五十萬季女  
泣白其母曰奈何以是累吾先人也卒拒不納太后  
崩帝思修古忠特贈右諫議大夫賜其家錢二十萬  
錄其壻劉勲爲試將作監主簿修古無子以兄子覲

爲後覲知封州儂智高亂死之見忠義傳第修睦性  
廉介自立與修古同時舉進士有聲鄉里累官尚書  
都官員外郎知邵武軍御史中丞杜衍薦以爲侍御  
史歲餘改司封員外郎出知壽州徙泉州坐失舉奪  
一官罷去後以知吉州不行上書請老不聽分司南  
京未幾致仕年五十一章得象表其高詔還所奪官  
卒曹氏自修古以直諒聞其女子亦能不累於利至  
覲又能死其官而修睦亦恬於仕進不待老而歸世  
以是賢之

郭勸字仲褒鄆州須城人舉進士授寧化軍判官累

遷太常博士通判密州特遷尚書屯田員外郎梓州  
路轉運判官以母老固辭復爲博士通判萊州州民  
霍亮爲仇人誣罪死吏受賕傳致之勸爲辨理得免  
擢殿中侍御史時宋綬出知應天府杜衍在荆南勸  
言綬有辭學衍清直不宜處外又言武勝軍節度使  
錢惟演遷延不赴陳州覬望相位弟惟濟任觀察使  
定州總管自請就遷留後胡則以罪罷三司使乃遷  
工部侍郎集賢院學士請趣惟演上道罷惟濟兵權  
追則除命又論劉從德遺奏恩濫貶太常博士監維  
州稅改祠部員外郎知萊州月餘復爲侍御史判三

司塩鐵勾院郭皇后廢議選納陳氏勸進諫曰正家以正天下自后妃始郭氏非有大故不當廢陳氏非世閔不可以儼宸極疏入后已廢而陳氏議遂寢遷兵部員外郎兼起居舍人同知諫院馬季良自貶所求致仕朝廷從之勸言致仕所以待賢者豈負罪貶黜之人可得請追還敕誥又言發運使劉承德獻輪扇浴器大率以媚上也請付外毀以戒邪佞趙元昊襲父位以勸爲官告使所遺百萬悉拒不受還兼侍御史知雜事權判流內銓遷工部郎中度支副使拜天章閣待制知延州元昊將山遇率其族來歸且言

元昊將反勸與兵馬鈴轄李渭議自德明納貢四十  
年有內附者未嘗留乃奏卻之是冬元昊果反遣其  
使稱偽官來勸視其表函猶稱臣因上奏曰元昊雖  
僭中國名號然尚稱臣可漸以禮屈之願與大臣熟  
議遂落職知齊州改淄州數月移磁州元昊益侵邊  
關陝擾攘言者猶指勸不當絕山遇事又降兵部負  
外郎丁母憂起復知鳳翔府尋復待制召權戶部副  
使以龍圖閣直學士知滑州再遷兵部郎中徙滄州  
又徙成德軍盜起甘陵徙鄆州既而知成德軍韓琦  
言勸所遣將張忠劉遵平賊功皆第一特詔獎諭未

幾召爲翰林侍讀學士復判流內銓改左諫議大夫  
權御史中丞遷給事中辭不受而請贈其祖萊陽令  
寧遂以爲尚書祠部員外郎衛士有相惡者陰置刃  
衣篋中從刃當皇城司楊景宗入禁門旣而爲閹者  
所得景宗輒隱不以聞勸請先治景宗罪章再上不  
聽又廷爭累日卒貶景宗祀明堂將加恩中外官勸  
就齋次帥群御史求對不許又極論之是年復爲侍  
讀學士同知通進銀臺司勸性廉儉居無長物嘗謂  
諸子曰顏魯公云生得五品服章絀任子爲齋卽足  
矣及再爲侍讀曰吾起諸生志不過郡守今年七十



字四百八十八  
卷五十一  
十一  
子惠刊

列侍從可以歸矣遂用元日拜章三上不得謝賜銀使市田宅後二年卒子源明治平中為太常博士會御史知雜事呂誨等奏彈中書議追崇濮安懿王典禮非是被黜以源明補監察御史裏行源明乞免除命請追誨等遂聽免後以職方員外郎知單州卒

段少連字希逸開封人其母嘗夢鳳集家庭寤而生少連及長美姿表倜儻有識度舉服勤詞學為試秘書省校書郎知崇陽縣崇陽劇邑自張詠為令有治狀其後惟少連能繼其風迹權杭州觀察判官預校道經改秘書省著作佐郎歷知蒙城名山金華三縣

以本省丞爲審刑院詳議官張士遜守江寧辟通判  
府事還爲御史臺推直官遷太常博士論劉從德遺  
奏恩濫降祕書丞監漣水軍酒稅復爲博士通判天  
雄軍太后崩召爲殿中侍御史與孔道輔等伏閣言  
郭皇后不當廢少連坐贖復上疏曰陛下親政以來  
進用直臣開闢言路天下無不歡欣一旦以諫官御  
史伏閣遽行黜責中外皆以爲非陛下意蓋執政大  
臣假天威以出道輔仲淹而斷來者之說也竊觀戒  
諭自今有章宜如故事密上毋得群詣殿門請對且  
伏閣上疏豈非故事今遽絕之則國家復有大事誰

敢旅進而言者昔唐陽城王仲舒伏閣雪陸贄崔元  
亮叩殿陛理宋申錫前史以爲美事今陛下未忍廢  
黜皇后而兩府列狀議降爲妃諫官御史安敢緘默  
陛下深惟道輔等所言爲阿黨寧爲忠亮乎疏入不  
報又上疏曰高明粹清凝德無累者天之道也氛祲  
蔽翳晦明偶差乃陰陽之沴爾象天德者君之體也  
治陰陽者臣之職也陛下秉一德臨萬方有生之類  
莫不浸涵德澤而氛祲蔽翳偶差晦明以累聖德者  
由大臣懷祿而不諫小臣畏罪而不言臣獨何人敢  
貢狂瞽竊痛陛下履仁聖之具美乏骨鯁之良輔因

成不忍之忿又稽不遠之復臣是以瀝肝膽披情懷  
爲陛下廓清氛祲蔽翳之累易曰夫夫婦婦而家道  
正正家而天下定詩云刑于寡妻以御于家邦若然  
則君天下修化本者莫不自內而刑外也况聞入道  
降妃之議出自臣下且后妃有罪黜則告宗廟廢則  
爲庶人安有不示之於天下不告之於祖宗而陰行  
臣下之議乎且皇后以小過降爲妃則臣下之婦有  
小過者亦當降爲妾矣比抗章請對不蒙賜召豈非  
奸邪之臣離間陛下耶臣等赴中書時執政之臣謂  
后有妬忌之行始議入道終降爲妃兼云有上封者

字四百九十九  
天惠刊  
慮后不利於聖躬故築高垣置在別館臣等備言中外之議以爲未可願速降明詔復中宮位號以安民心翌日詔出乃云中宮有過掖庭具知特示涵容未行遽黜置之別館俾自省脩供給之間一切如故臣未審黜置別館爲后爲妃詔書不言安所取信况皇后事陛下紀有餘而輔臣倉卒以降黜之議惑於宸聽搢紳循默無敢爲陛下言者臣所謂氛祲蔽翳以累聖德者蓋臣職有曠爾臣竊恐奸邪之人引漢武幽陳皇后故事以誦惑陛下且漢武驕奢淫縱之主固不足踵其行事而爲人臣者思致君如堯舜豈

致君如漢武哉今皇后置於別館必恐懼脩省陛下  
仁恕之德施於天下而獨不加於中宮乎願詔復中  
宮位號杜絕非間待之如初天地以正陰陽以和人  
神共懽豈不美哉陛下苟爲邪臣所蔽不加省察臣  
恐高宗王后之枉必見於他日宮闈不正之亂未測  
於將來惟聖神慮焉未幾除開封府判官改尚書刑  
部員外郎直集賢院爲三司度支判官出爲兩浙轉  
運副使舊使者所至郡縣索簿書不暇殫閱往往委  
之吏胥吏胥持以爲貨少連命郡縣上簿書悉織識  
遇事間指取一二自閱適其非是者按之餘不及閱



者全織識以還由是吏不能為奸而州縣簿書莫敢不治矣部吏有過召詰曰聞子所為若此有之乎有當告我我容汝自新苟以為無吾不使善人被謗即為汝辨明矣吏不敢欺皆以實對少連每得其情諄諄戒飭使去後有能自改過者猶保任之秀州獄死無罪人時少連在杭吏畏恐聚謀偽為死者服罪款未及綴屬少連已拏舟入城訊獄吏具服請罪以為神明是時鄭向守杭無治才訟者不服徃徃自州出徑趨少連少連一言處決莫不盡其理徙使淮南兼發運司事加兵部員外郎又徙陝西駙馬都尉柴宗

慶知陝州縱其下撓民少連入境劾奏之入兼侍御  
史知雜事踰月爲度支三司副使河東地震奉使安  
撫還擢工部郎中天章閣待制知廣州時元昊反范  
仲淹薦少連才堪將帥遷龍圖閣直學士知涇州改  
渭州命未至而卒少連通敏有才遇事無大小決遣  
如流不爲權勢所屈旣卒仁宗歎惜之

論曰古人有言山有猛獸藜藿爲之不採當天聖明  
道間天子富於春秋母后稱制而內外肅然紀綱具  
舉朝政亡大闕失奸人不得以自肆者繇言路得人  
故也是時孔道輔鞠詠劉隨曹修古迭爲諫官御史



郭勸段少連繼之皆侃侃正色遇事輒言雖被斥逐  
不更其守及帝既親政道輔勸少連復任言責郭后  
之廢引議慷慨犯人主責大臣其氣益壯遺風餘烈  
天下至今稱之詩所謂邦之司直其庶幾歟

列傳卷第五十六

列傳卷第五十七

宋史二百九十八

開禧僞言上柱國錄國事可書丞相權翼領經筵都總裁等奉

勅修

彭乘

嵇頴

梅摯

司馬池

從子旦

里曾  
孫朴

李及

燕肅

子度  
孫瑛

蔣堂

劉瓊

馬亮

陳希亮

彭乘字利建益州華陽人少以好學稱州里進士及

第嘗與同年生登相國寺閣皆瞻顧鄉關有從宦之

樂乘獨西望悵然曰親老矣安敢舍晨昏之奉而圖

一身之榮乎翌日奏乞侍養居數日授漢陽軍判官

遂得請以歸久之有薦其文行者召試爲館閣校勘  
固辭還家後復除鳳州團練推官天禧初用寇準薦  
爲館閣校勘改天平軍節度推官預校正南北史隨  
書改秘書省著作佐郎遷本省丞集賢校理懇求便  
親得知普州蜀人得守鄉郡自乘始普人鮮知學乘  
爲興學召其子弟爲生負教育之乘父卒旣葬有耳  
露降于墓栢人以爲孝感服除知荆門軍改太常博  
士召還同判尚書刑部出知安州徙提點京西刑獄  
改夔州路轉運使會土賊田忠霸誘下溪州蠻將內  
寇乘適按郡至境大集邊吏勒兵下山以備賊賊遁

去因遣人間之其黨斬忠霸夷其家召脩起居注擢  
知制誥累遷工部郎中入翰林爲學士領吏部流內  
銓三班院爲群牧使既病仁宗勅太醫診視賜以禁  
中珍劑卒賜白金三百兩御史知雜何郊論請贈官  
不許詔一子給奉終喪初修起居注缺中書舍人而  
乘在選中帝指乘曰此老儒也雅有恬退名無以易  
之及召見諭曰卿先朝舊臣久補外而未嘗自言對  
曰臣生孤遠自量其分安敢過有所望帝頗嘉之乘  
質重寡言性純孝不喜事生業聚書萬餘卷皆手自  
刊校蜀中所傳書多出於乘晚歲歷典贊命而文辭

少工云

嵇穎字公實應天宋城人父適嘗爲石首主簿民有父子坐重繫府檄適按之抵其父於法而子獲免父死假人言曰主簿仁人也行且生賢子後必大明年穎生天聖中進士及第授蔡州團練判官王曾知青州徙天雄軍皆辟爲從事後用曾薦遷太子中允爲集賢校理歷開封府推官三司度支判官同修起居注擢知制誥累遷尚書兵部員外郎召入翰林爲學士未及謝卒詔以告敕襲衣金帶鞍勒馬賜其家穎舉進士時王曾張知白相繼爲南京留守見穎謹厚

篤學謂其子弟曰若曹師表也張堯封嘗從頴學所  
爲文多留頴家其後堯封女入禁中爲修媛甚被寵  
幸令其弟化基詣頴求編次其父橐爲序以獻之頴  
不答亦不以獻

梅摯字公儀成都新繁人進士起家大理評事知藍  
田上元縣徙知昭州通判蘇州二浙饑官貸種食已  
而督償頗急摯言借貸本以行惠乃重困民詔緩輸  
期慶曆中擢殿中侍御史時數有災異引洪範上  
變戒曰王省惟歲謂王總群吏如歲四時有不順則  
省其職今日食于春地震于夏雨水于秋一歲而變

及三時此天意以陛下省職未至而丁寧戒告也伊  
洛暴漲漂廬舍海水入台州殺人民浙江潰防黃河  
溢埽所謂水不潤下陛下宜躬責脩德以回上帝之  
眷佑陰不勝陽則災異衰止而盛德日起矣徒開封  
府推官遷判官僧常瑩以簡札達宮人輦官鄭玉醉  
呼歐徼巡卒皆釋不問摯請悉杖配之改度支判官  
進侍御史論石元孫不死行陳係縲以還國之辱也  
不斬無以厲邊臣再奏不報李用和除宣徽使加同  
中書門下平章事摯言國初杜審瓊亦帝舅也官止  
大將軍李繼隆累有戰功晚年始拜使相祖宗慎名

器如此今不宜亟授無功以戶部員外郎兼侍御史  
知雜事權判大理寺言權陝西轉運使張堯佐非才  
繇宮掖以進恐上累聖德及奏減資政殿學士員召  
待制官同議政復百官轉對帝謂大臣曰梅摯言事  
有體以爲戶部副使會宴契丹使紫宸殿三司副使  
當坐殿東廡下同列有謂典宴例坐殿上而大宴當  
止殿門外爾因不即坐與劉湜陳洎趨出降知海州  
徙蘇州入爲度支副使初河北歲饑三司益漕江淮  
米餉河北後江淮饑有司尚責其數摯奏減之擢天  
章閣待制陝西都轉運使還判吏部流內銓進龍圖



閣學士知滑州州歲備河調丁壯伐灘葦摯以疲民  
奏用州兵代之河大漲將決夜率官屬督工徒完隄  
水不為患詔獎其勞旬當三班院同知貢舉請知杭  
州帝賜詩寵行累遷右諫議大夫徙江寧府又徙河  
中卒摯性淳靜不為矯厲之行政迹如其為人平居  
未嘗問生業喜為詩多警句有奏議四十餘篇  
司馬池字和中自言晉安平獻王孚後征東大將軍  
陽葬安邑瀾洄曲後魏析安邑置夏縣遂為縣人池  
少喪父家貲數十萬悉推諸父而自力讀書時議者  
以蒲坂竇津大陽路官運鹽回遠聞乃開崕口道自

聞喜逾山而抵垣曲咸以爲便池謂人曰昔人何爲捨逕而就迂殆必有未便者衆不以爲然未幾山水暴至鹽車人牛盡没入河衆乃服舉進士當試殿庭而報母亡交匿其書池心動夜不能寐曰吾母素多疾家豈無有異乎行至宮城門徘徊不能入因語其友而友止以母疾告遂號慟而歸後中第授永寧主簿出入乘驢與令相惡池以公事謂令令南向踞坐不起池挽令西向偶坐論事不爲少屈歷建德卑縣尉蜀人妄言戍兵叛蠻將入寇富人爭瘞金銀逃山谷間令問丘夢松假他事上府主簿稱疾不出池攝縣

事會上元張燈乃縱民遊觀凡三夕民心遂安調鄭州防禦判官知光山縣禁中營造詔諸州調竹木州符期三日畢輸池以上不產大竹轉市蘄黃非三日可致乃更與民自為期約過不輸者罪之既而輸竹先諸縣盛度薦於朝改秘書省著作佐郎監安豐酒稅徙知小溪縣劉燁知河南府辟知司錄參軍事歲餘通判留守司樞密使曹利用奏為群牧判官辭不就朝廷固授之利用嘗委括大臣所負進馬價池曰令之不行由上犯之公所負尚多不先輸何以趣他人利用驚曰吏給我已輸矣亟命送官數日而諸負

者皆入利用貶其黨畏罪從而毀短者甚衆池獨颺  
言于朝稱利用枉朝廷卒不問會詔百官轉對池言  
唐制門下省詔書之出有不便者得以封還今門下  
雖有封駁之名而詔書一切自中書以下非所以防  
過舉也內侍皇甫繼明給事章獻太后閣兼領估馬  
司自言估馬有羨利乞遷官事下群牧司閱無羨利繼明方  
用事自制置使以下皆欲附會為奏池獨不可除開封府  
推官敕至閣門為繼明黨所沮罷知耀州擢利州路  
轉運使知鳳翔府召知諫院上表懇辭仁宗謂宰相  
曰人皆嗜進而池獨嗜退亦難能也加直史館復知

鳳翔有疑獄上讞大理輒復下掾屬惶遽引咎池曰  
長吏者政事所繇非諸君過乃獨承其罪有詔勿劾  
岐陽鎮巡檢夜飲富民家所部卒執之俾為約不敢  
復督士卒而後釋其縛池捕首惡誅之巡檢亦坐廢  
累遷尚書兵部員外郎遂兼侍御史知雜事嘗言陝  
西用兵無宿將劉平好自用而少智謀必誤大事後  
平果敗更戶部度支鹽鐵副使歲滿中書進名帝曰  
是固辭諫官者擢天章閣待制知河中府徙同州又  
徙杭州池性質易不飾厨傳剽劇非所長又不知吳  
俗以是謗譏聞朝廷轉運使江鈞張從革劾池決事

不當十餘條及稽留德音降知虢州初轉運使既奏池會更有盜官銀器械州獄自陳為鈞掌私厨出所賣過半又越州通判載私物盜稅乃從革之姻遣人私請或謂池可舉劾以報仇池曰吾不為也人稱其長者徙知晉州卒子旦光光自有傳從子里

旦字伯康清直敏強雖小事必審思度不中不釋以父任為秘書省校書郎歷鄭縣主簿鄭有婦蘭訟奪人田者家多金錢市黨賈吏合為奸謾十年不決旦取案一閱情偽立見黜吏十數輩寃者以直又并元慶豪欺鄉里莫敢誰何旦擒致于法時旦年尚少上

四百五十八  
下易之自是驚服吏捕蝗因緣搔民旦言蝗民之仇  
宜聽自捕輸之官後著為令丁內外艱服除監饒州  
永平鑄錢監知祁縣天大旱人乏食群盜剽斂富家  
巨室至以兵自備旦召富者開以禍福於是爭出粟  
減直以糶猶不失其贏飢者獲濟盜患亦弭舉監在  
京百萬倉時祁隸太原以太原留不召通判乾州未行舉  
監在京雜物庫知宜興縣其民囂訟旦每獄必窮根株  
痛繩之校繫縣門民稍以詆冒為耻市貫大溪賈朝  
所作長橋壞廢歲久旦勸民葺復不勞而成時王安  
石守常州開運河調夫諸縣旦言役大而亟民有不

勝則其患非徒不可就而已請令諸縣歲遞一役雖  
緩必成安石不聽秋大霖雨民苦之多自經死役竟  
罷歷知梁山軍安州旦治郡有大體所施設取於適  
理便事再監鳳翔太平宮以熙寧八年致仕歷官十  
七遷至大中大夫元祐二年卒年八十二旦澹薄無  
欲奉養苟完人不見其貴與弟光尤友愛終始人無  
間言光居洛旦居夏縣皆有園沼勝槃光歲一徃省  
旦旦亦間至洛視光凡光平時所與論天下事旦有  
助焉及光被門下侍郎召固辭不拜旦引大義語之  
曰生平誦堯舜之道思致其君今時可而違非進退



字四百个  
陳參  
刊  
之正也光幡然就位方是時天下懼光之終不出及聞此皆欣然稱旦曰長者之言也英宗即位例以親屬入賀得官時旦在梁山諸孫未仕者皆不遣惟遣其從兄子稟旦與人交以信義喜周其急嘗有以罪免官貧不能存者月分俸濟之其人無以報願以女爲妻旦驚謝之亟出妻奩中物使嫁之旦生於丙午與文彥博程公珣席汝言爲同年會賦詩繪像世以爲盛事比唐九老三子良試將作監主簿富永承議卽陝州通判宏陳留令宏子朴

里字昭遠進士釋褐授威勝軍判官改大理寺丞龐

籍爲鄜延經略使奏通判鄜州州將武人不法里平  
居與之驩甚臨事正色力爭不少假借性廉靜質直  
所至有惠政每罷官至京師未嘗有所謁視審官榜  
父闕人所不取者乃受之而去後知乾州爲太常少  
卿而卒

朴字文季少育于外祖范純仁紹聖黨事起父宏上  
書論辨得罪純仁責永州疾失明客至必令朴導以  
見時方七歲進揖應對如成人客皆驚嘆以純仁遺  
恩爲官宏死徒跣負柩還調晉寧軍士曹參軍通判  
不法轉運使王似諷朴伺其過朴不可曰下吏而陷

長官不唯亂常人且不食吾餘矣死不敢奉教似賢而薦之靖康初入爲虞部右司員外郎金人次汴郊命朴使之二酋問朴家世具以告喜曰賢者之後也待之加禮乃吐腹心諭以亟求講解朴復命任事者疑不決都城陷欽宗思朴之言以爲兵部侍郎二帝將北遷又貽書請存立趙氏金人憚之挾以北去且悉取其孥開封儀曹趙鼎爲匿其長子倬於蜀故得免建炎登極赦至燕朴私令齋詣徽宗爲人所告金主憐其忠釋之徽宗崩朴與奉使朱弁在燕共議制服弁欲先請朴曰爲臣子聞君父喪當致其哀尚何

請設請而不許柰何遂服斬衰朝夕哭金人亦義而  
不問又遣朱松年間行以金人情實歸報宗因王倫  
出使持黃金賜朴倫還言金命朴爲行臺左丞朴辭  
而止益重之後卒於真定訃聞詔稱其忠節顯著贈  
兵部尚書謚曰忠潔

李及字幼幾其先范陽人後徙鄭州父覃左拾遺及  
舉進士再調昇州觀察推官寇準薦其才擢大理寺  
丞知興化軍以殿中丞通判曹州州民趙諫者素無  
賴持郡短長縱爲奸利及受命諫在京師乃謁及及  
不之見慢罵而去投匿名書誣及因以毀朝政會上

封者發諫事命轉運使與及察其狀及條上諫前後  
所爲不道詔御史劾得其實斬於都市及由是知名  
擢知隴州初置提點刑獄內出及與陳綱二人名付  
中書明日以綱使河北及使陝西特遷一官還判三  
司磨勘司出知鳳翔府徙延州除三司戶部副使爲  
淮南轉運使累遷太常少卿知秦州議者以及謹厚  
非守邊才及至秦州州將吏亦頗易之會有禁卒白  
晝攫婦人金釵於市吏執以來及方坐觀書召之使  
前略加詰問其人服罪及亟命斬之觀書如故於是  
將士皆驚服改左司郎中樞密直學士以右諫議大

夫召還旬當三班院再遷尚書工部侍郎歷知杭州  
鄆州應天河南府召拜御史中丞卒年七十特贈禮  
部尚書謚恭惠及資質清介所治簡嚴喜慰薦下吏  
而樂道人之善在杭州惡其風俗輕靡不事宴游一  
日冒雪出郊衆謂當置酒召客乃獨造林逋清談至暮  
而歸居官數年未嘗市吳中物比去唯市白樂天集  
在河南杜衍爲提點刑獄間與衍會而具甚踈薄他  
日中貴人用事者至亦無加品衍歎其清德娶張氏性  
嫉悍及嘗生子鞠之外舍張固請歸保養之乃會親  
屬以子擊堂柱碎其首及遂無子以弟之子爲後

燕肅字穆之青州益都人父峻慷慨任俠楊光遠反時率其屬迎符彥卿遂家曹州肅少孤貧游學舉進士補鳳翔府觀察推官寇準知府事薦改秘書省著作佐郎知臨邛縣縣民嘗苦吏追擾肅削木爲牘民訟有連逮者書其姓名使自召之皆如期至知考城縣通判河南府召爲監察御史準方知河南奏留之遷中侍御史提點廣南西路刑獄遷侍御史徙廣南東路還爲丁謂所惡出知越州徙明州俗輕悍喜鬪肅下令獨罪先毆者於是鬪者爲息直昭文館爲定王府記室叅軍判尚書刑部建言京師大辟一覆奏

而州郡之獄有疑及情可憫者上請多爲法司所駁  
乃得不應奏之罪願如京師死許覆奏遂詔疑獄及  
情可憫皆上請語在刑法志其後大辟上請者多得  
貸議自肅始擢龍圖閣待制權知審刑院知梓州還  
同糾察在京刑獄再判刑部累遷左諫議大夫知亳  
州徙清州屬歲歉命兼京東安撫使入判太常寺兼  
大理寺復知審刑肅言舊太常鐘磬皆設色每三歲  
親祠則重飾之歲旣久所塗積厚聲益不協乃詔與  
李照宋初同按王朴律即刻滌考擊合以律準試於  
後苑聲皆協又詔與章得象馮元詳刻漏進龍圖閣



直學士知潁州徙鄧州官至禮部侍郎致仕卒肅喜  
爲詩其多至數千篇性精巧能畫入妙品圖山水菴  
布濃淡意象微遠尤善爲古木折竹嘗造指南記里  
鼓二車及欹器以獻又上蓮花漏法詔司天臺考於  
鐘鼓樓下云不與崇天曆合然肅所至皆刻石以記  
其法州郡用之以候昏曉世推其精密在明州爲海  
潮圖著海潮論二篇子度孫瑛

度字唐卿登進士第知陳留縣京東蝗年飢盜發度  
勸邑豪出粟六萬以濟民又行保伍法以察盜善狀  
日聞通判永興軍三司使王堯臣舉爲戶部判官以

伐闕淺始命權發遣遂爲故事出知滑滑與黎陽對  
境河埽下臨魏都霖潦暴至新芻不屬度曰魏實爲  
河朔根本不可坐視成敗悉以所儲芟捷禦之埽賴  
以不潰復爲戶部判官歲皇祐甲午益州言歲在甲  
午蜀再亂今又值之民爲戚戚乃命度出使備不虞  
還奏無足慮權河北轉運副使六塔河決坐貶秩知  
蔡州徙福州閩故多盜度請假事權制攝一道遂加  
兵馬鈐轄入爲戶部副使以右諫議大夫知潭州卒  
年七十度有心計凡六佐大農慶曆中三司請權河  
北鹽度言川峽不榷酒河北不禁鹽此祖宗順民俗

四百七十一  
不易之制也。權之非是，會張方平亦論之。議遂寢。

瑛字仁叔，以蔭爲瑕丘尉。縣人習爲盜，瑛榜論曰：「今平民或呼以盜，必怒見詞色。顧乃舍耕稼本業，爲人所不肯爲者，及陷於罪，則終身不齒於鄉閭。尉不忍以是待汝，盜感悟爲稍弭。累遷太府丞，開封少尹。歷廣東轉運判官，進副使，加直秘閣。時方尚老氏教，瑛言守臣任滿考課，乞以興宗教法，拯葺道宮爲善最從之。連進直龍圖閣。時瑛在嶺嶠七年，括南海犀珠香藥奉宰相，內侍人目之爲香燕。遂以徽猷閣待制提舉醴泉觀，拜戶部侍郎。徽宗賜書仁人義士之家。

以表之蓋取王安石頌其曾大父肅詩語也轉開封  
尹賜進士出身兼侍讀且將大用後以御史言瑛不  
能撥煩戢奸吏致賊殺不辜罷爲龍圖閣直學士未  
數月爲戶部尚書靖康初以龍圖閣學士知河陽金  
兵入寇三城當兵衝瑛至未及備而兵騎大集乘銳  
攻城瑛不能禦將出奔爲亂兵所害年五十建炎初  
賜端明殿學士

蔣堂字希魯常州宜興人擢進士第爲楚州團練推  
官滿歲吏部引對真宗覽所試判善之特授大理寺  
丞知臨川縣縣富人李甲多爲不法前令莫能制堂

戒諭不悛白州以兵索其家得僭乘輿物置于死歷  
通判眉許吉楚州以太常博士知泗州召爲監察御  
史禁中火有司請究所起多引宮人屬吏堂言火起  
無迹安知非天意也陛下宜脩德應變有司乃欲歸  
咎宮人以之屬吏何求不可而遂賜之死是重天譴  
也詔原之論奏郭皇后不當廢坐贖再遷侍御史判  
三司度支句院出爲江南東路轉運使徙淮南兼江  
淮發運事時廢發運使上封者屢以爲非便堂言唐  
裴耀卿劉晏第五琦李巽裴休皆嘗爲江淮河南轉  
運使不聞別置使名國朝衮王嗣宗劉師道亦止

爲轉運兼領發運司事而歲輸京師常足時雖用其  
議後卒復在江淮歲薦部吏二百人或謂曰一有謬  
舉且得罪何以多爲堂曰十得二三亦足報國坐失  
按蘄州王蒙正故入部吏死罪降知越州州之鑑湖  
馬臻所爲溉田八千頃食利者萬家前守建言聽民  
自占多爲豪右所侵堂奏復之徙蘇州入判刑部徙  
戶部句院歷戶部度支鹽鐵副使安撫梓夔路擢天  
章閣待制江淮制置發運使先是發運使上計造大  
舟數十載江湖物入遺京師權貴堂曰吾豈爲此歲  
入自可附驛奏也前後五年未嘗一至京師就除河

東路都轉運使未行知洪州改應天府累遷左司郎  
中知杭州以樞密直學士知益州慶曆初詔天下建  
學漢文翁石室在孔子廟中堂因廣其舍爲學宮選  
屬官以教諸生士人翕然稱之揚日嚴在蜀有能名  
堂素不樂之於是節遊宴減厨傳專尚寬縱頗變日  
嚴之政又建銅壺閣其制宏敞而材不預具功既半  
乃伐喬木于蜀先主惠陵江濱祠又毀后土及劉禪  
祠蜀人浸不悅獄訟滋多久之或以爲私官妓徙河  
中府又徙杭州蘇州以尚書禮部侍郎致仕卒特贈  
吏部侍郎堂爲人清修純飭遇事毅然不屈貧而樂

施好學工文辭延譽晚進至老不倦尤嗜作詩有吳

門集二十卷

劉瓊字道元建州崇安人進士中第補廣德軍判官  
累遷尚書屯田員外郎權侍御史李照改制大樂鐘  
磬瓊以爲樂之大本與政化通不當輕易其器願擇  
博學之士以補卿丞凡四方妄獻說以要進者請一  
切罷之帝善其言歷三司戶部判官判度支句院江  
西兩浙淮南轉運使加直史館知陝州改太常少卿  
知廣州所至有廉名權三司度支副使桂陽監蠻唐  
和寇邊以右諫議大夫龍圖閣直學士知潭州兼湖



南安撫使初至遣人諭蠻酋使降不從乃舉兵擊敗和于銀江源進破其巢穴蠻逃遁遠去前將以帛購蠻首至是有持首取購者按問乃輒殺平民誅之而罷購州境獲安還權判吏部流內銓知審刑院河北大水民流入京東爲盜詔增京東守備帝問誰可守鄆者宰相以夔對進給事中樞密直學士以往至鄆發廩振飢民賴全活者甚衆盜賊衰息賜書褒諭大臣議欲脩復河故道夔極言其不可遂罷遷工部侍郎知福州請解官入武夷山爲道士弗許知建州尋告老遂以戶部侍郎致仕英宗即位遷吏部卒年八

十三瓊嘗過江東見二囚繫雷系年矣問之曰前此殺  
吉州掾徐咸疑二人者瓊爲言於朝釋之後果得真  
盜嘗遇隱者得養生術遂蔬食及獨居退處一閭家  
人罕見其面至老手足耳目強明如少壯時不治財  
產所收私田有餘穀則以振鄉里貧人前死數日自  
作遺表以祿賜所餘分親族告其家人曰某日吾死  
矣如期而死無子

馬亮字叔明廬州合肥人舉進士爲大理評事知蕪  
湖縣再遷殿中丞通判常州吏民有因緣亡失官錢  
籍其貲猶不足以償妻子連逮者至數百人亮縱去

三百九十五  
緩與之期不踰月盡輸所負羅處約使江東以亮治  
行聞擢知濮州會諸路轉運司置糾察刑獄官以福  
建路命亮覆訊冤獄全活者數十人遷太常博士知  
福州蘇易簡薦亮才任繁劇召還同提點三司都句  
院磨勘憑由司久之出知饒州州豪白氏多執吏短  
長嘗殺人以赦免愈驕橫爲閭里患亮發其奸誅之  
部中畏懾州有鑄錢監匠多而銅錫不給亮請分其  
工之半別置監于池州歲增鑄緡錢十萬遷殿中侍  
御史真宗即位上書言陛下初政軍賞宜速而所在  
不時給請遣使分督之又赦書蠲除州縣逋負而有

司趣責愈急宜如赦推恩以寬民故事以親王尹開  
封地尊勢重嫌隙易生願鑒其繇以示保全親愛之  
道契丹仍歲南侵河朔蕭然請修好以息邊民帝善  
其言以亮爲可用王均反以爲西川轉運副使賊平  
主將邀功誅殺不已亮全活千餘人城中米斗千錢  
亮出廩米裁其價人賴以濟召問蜀事會穢送賊誣  
誤者八十九人至闕下執政欲盡誅之亮曰愚民脅  
從此特百之一二餘竄伏山林者衆今不貸之反側  
之人聞風疑懼一唱再起是滅一均生一均也帝悟  
悉宥之加直史館復遣還部時諸州塩井歲久泉涸

四百令本  
而官督所負課繫捕者州數百人亮盡釋繫者而奏  
廢其井又除屬部舊逋官物二百餘萬還知潭州屬  
縣有亡命卒剽攻爲鄉閭患人共謀殺之事覺法當  
死者四人亮感貸之曰爲民去害而反坐以死罪非  
法意也徙昇州行次江州屬歲旱民飢湖湘漕米數  
十舟適至亮移文守將發以振貧民因奏瀕江諸郡  
皆大歉而吏不之救願罷官糴令民轉粟以相賙以  
右諫議大夫知廣州時宜州陳進初平而澄海兵從  
進反者家屬二百餘人法當配隸亮悉置不問益戶  
逋課質其妻子於富室悉取以還其家海舶久不至

使招來之明年至者倍其初珍貨大集朝廷遣中使  
賜宴以勞之是歲東封亮敷諭大食陀婆離蒲含沙  
貢方物泰山下歷知虔洪二州江陵府再遷尚書工  
部侍郎復知昇州徙杭州加集賢院學士先是江濤  
大溢調兵築堤而工未就詔問所以捍江之策亮稟  
詔禱伍員祠下明日潮爲之却出橫沙數里隄遂成  
入爲御史中丞建言士民父祖未葬而析居請自今  
未葬者毋得輒析明年改兵部侍郎知廬州徙江陵  
又徙江寧府仁宗初拜尚書右丞復知廬州召判尚  
書都省兼知審刑院遷工部尚書知亳州又遷江寧

四百令未  
府以太子少保致仕卒贈尚書右僕射亮有智略敏  
於政事然其所至無廉稱呂夷簡少時從其父蒙亨  
爲縣福州亮見而竒之妻以女妻劉恚曰嫁女當與  
縣令兒邪亮曰非爾所知也陳執中梁適爲京官田  
況宋庠及其弟初爲童子時亮皆厚遇之曰是後必  
大顯世以亮爲知人亮卒時夷簡在相位有司謚曰  
忠肅人不以爲是也子仲甫爲天章閣待制

陳希亮字公弼其先京兆人唐廣明中違難遷眉州  
青神之東山希亮幼孤好學年十六將從師其兄難  
之使治錢息三十餘萬希亮悉召取錢者焚其券而

去業成乃召兄子庸諭使學遂俱中天聖八年進士  
第里人表其閭曰三雋初爲大理評事知長沙縣有  
僧海印國師出入章獻皇后家與諸貴人交通恃勢  
據民地人莫敢正視希亮捕治實諸法一縣大聳柳  
州竹場有僞爲券給輸戶送官者事覺輸戶當死希  
亮察其非辜出之已而果得其造僞者再遷殿中丞  
徙知鄂縣老吏曹腆侮法以希亮年少易之希亮視  
事首得其罪腆叩頭出血願自新希亮戒而捨之卒  
爲善吏巫覡歲斂民財祭鬼謂之春齋否則有火災  
民訛言有緋衣三老人行火希亮禁之民不敢犯火



亦不作毀滯祠數百區勒巫爲農者七十餘家及罷去父老送之出境泣曰公去我緋衣老人復出矣遷太常博士有言柳撤活人死罪賜五品服初蜀人官蜀不得通判州事希亮以母老願折資爲縣侍親於是知臨津縣母終服除爲開封府司錄司事福勝塔火官欲更造度用錢三萬希亮言陝西用兵願以此餽軍詔罷之青州民趙禹上書言趙元昊必反宰相以禹狂言徙建州元昊果反禹訟所部不受亡至京自理宰相怒下開封獄希亮言禹可賞不可罪爭不已上釋禹賞爲徐州推官且欲以希亮爲御史會外

戚沈元吉以奸盜殺人希亮一問得實自驚仆死沈氏訴之詔御史劾希亮及諸掾吏希亮曰殺此賊者獨我耳遂引罪坐廢暮年盜起京西殺守令富弼薦希亮可用起知房州州素無兵備民凜凜欲亡去希亮以牢城卒雜山河戶得數百人日夜部勒聲振山南民恃以安殿侍雷甲以兵百餘人逐盜竹山甲不能戢所至爲暴或疑爲盜告希亮盜入境且及門希亮即勒兵阻水拒之命持滿無得發士皆植立如偶人甲射之不動乃下馬拜請死曰初不知公官軍也吏士皆欲斬甲以徇希亮獨治爲暴者十餘人使甲

以捕盜自贖時劇賊党軍子方張轉運使使供奉官  
崔德贇捕之德贇既失党軍子遂圍竹山民賊所嘗  
舍者曰向氏殺父子三人梟首南陽市曰此党軍子  
也希亮察其寃下德贇獄未服党軍子獲於商州詔  
賜向氏帛復其家流德贇通州或言華陰人張元走  
夏州爲元昊謀臣詔徙其族百餘口於虜幾察出入飢寒  
且死希亮曰元事虛實不可知使誠有之爲國者終不  
顧家徒堅其爲賊耳此又皆其踈屬無罪乃密以聞  
詔釋之老幼哭希亮庭下曰今當還故鄉然奈何去  
父母乎遂畫希亮像祠焉代還執政欲以爲大理少

卿希亮曰法吏守文非所願願得一郡以自效乃以爲宿州州跨汴爲橋水與橋爭常壞舟希亮始作飛橋無柱以便往來詔賜縑以褒之仍下其法自畿邑至于泗州皆爲飛橋皇祐元年移滑州奏事殿上仁宗勞之曰知卿疾惡無懲沈氏子事未行詔提舉河北便糴都轉運使魏瓘劾希亮擅增損物價已而瓘除龍圖閣學士知開封府希亮乞廷辨旣對仁宗直希亮奪瓘職知越州且欲用希亮希亮言臣與轉運使不和不得爲無罪力請還滑會河溢魚池埽且決希亮悉召河上使者發禁兵捍之廬於所當決吏民

涕泣更諫希亮堅卧不動水亦去人比之王尊是歲盜起宛句晝劫張郭鎮執濮州通判井淵仁宗以爲憂問執政可用者未及對仁宗曰朕得之矣乃以希亮爲曹州不逾月悉擒其黨淮南飢安撫轉運使皆言壽春守王正民不任職正民坐免詔希亮乘傳代之轉運使調里胥米而蠲其役凡十三萬石謂之折役米米翔貴民益飢希亮至除之且表其事旁郡皆得除又言正民無罪職事辦治詔復以正民爲鄂州久之徙知廬州虎翼軍士屯壽春者以謀反誅遷其餘不反者數百人於廬皆自疑不安一日有竊入府

舍將爲不利者希亮笑曰此必醉耳貸而流之盡以  
其餘給左右使令且以守倉庫人爲之懼希亮益加  
親信皆感德指心誓爲希亮死改提點刑獄江東遷  
度支郎中徙河北嘉祐二年入爲開封府判官改判  
三司戶部句院朝廷以三司事冗簿書留滯乃命希  
亮又兼開拆司榮州鬻鹽凡十八井歲久澹竭有司  
責課如初民破產籍沒者三百餘家希亮爲言還其  
所籍歲蠲三十餘萬斤三司簿書滯留者自天禧以  
來未帳六百有四明道以來生事二百一十二萬希  
亮日夜課吏凡九月去其三之二度支吏不時勾希

亮杖之副使以希亮擅決罰由是事復滯會接伴契  
丹使還自請補外乃以爲京西轉運使賜三品服石  
塘河役兵叛其首周元自稱周大王震動汝洛間希  
亮聞之即日輕騎出按吏請以兵從希亮不許其賊  
二十四人道遇希亮以希亮輕出意色闕和不能測  
遂相與列訴道周希亮徐問其所苦命一老兵押之  
曰以是付葉縣聽吾命既至令曰汝以自首皆無罪  
然必有首謀者衆不敢隱乃斬元以徇流軍校一人  
餘悉遣赴役如初遷京東轉運使維州參軍王康赴  
官道博平大猾有號截道虎者毆康及其女幾死吏

不敢問希亮移捕甚急卒流海島又劾吏故縱坐免者數人徐州守暴苛以細過籍民產數十家獲小盜使必自誣抵死希亮言其狀卒以廢去數上章請老不允移知鳳翔倉粟支十二年主者以腐敗爲憂歲飢希亮發十二萬石貸民有司懼爲擅發希亮身任之是秋大熟以新易舊官民皆便于聞使者入朝過秦州經略使以客禮享之使者驕甚留月餘壞傳舍什器縱其徒入市掠飲食民戶皆晝閉希亮聞之曰吾嘗主契丹使得其情使者初不敢暴橫皆譯者教之吾痛繩以法譯者懼其使不敢動矣況此小國乎



乃使教練使持符告譯者曰入吾境有秋毫不如法  
吾且斬若取軍令狀以還使者至羅拜庭下希亮命  
坐兩廊飲食之護出其境無一人譁者英宗即位遷  
太常少卿獄有盜法當死僚官持不可久之盜殺守  
吏遁去希亮以前議讞于朝而希亮之議是僚官懼  
欲以事中希亮希亮自顧無有其事始州郡以酒相  
餉例皆私有之而法不可希亮以遺游士之貧者既  
而曰此亦私也以家財償之遂借此上書自劾求去  
不已坐是分司西京未幾致仕卒年六十四希亮嘗  
夢異人按圖而告之年至是果然贈工部侍郎希亮

爲人清勁寡欲不假人以色自王公貴人皆嚴憚之  
見義勇發不計禍福所至奸民猾吏易心改行不改  
者必誅然出於仁恕故嚴而不殘少與蜀人宋輔游  
輔卒於京母老子端平幼希亮養其母終身以女妻  
端平使同諸子學卒登進士第四子悅度支郎中恪  
滑州推官恂大理寺丞健字季常少時使酒好劍用  
財如糞土慕朱家郭解爲人間里之俠皆宗之在岐  
下嘗從兩騎挾二矢與蘇軾遊西山鵲起於前使騎  
逐而射之不獲乃怒馬獨出一發得之因與軾馬上  
論用兵及古今成敗自謂一世豪士稍壯折節讀書

欲以此馳騁當世然終不遇洛陽園宅壯麗與公侯  
等河北有田歲得帛千匹晚年皆棄不取遜於光黃  
間曰岐亭庵居蔬食徒步往來山中妻子奴婢皆有  
自得之意不與世相聞人莫識也見其所著帽方屋  
而高曰此豈古方山冠之遺像乎因謂之方山子及  
蘇軾謫黃過岐亭識之人始知爲慥云

論曰乘雅恬退穎不阿貴戚有儒者之風摯淳靜而  
不矯池質易而長厚肅議法平恕及堂堊清修自守  
蓋侍從之選也希亮爲政嚴而不殘其良吏與馬亮  
饒才智而寡廉稱士論以此惜之  
列傳第五十七

列傳卷第五十八

宋史二百九十九

開禧置司榷鹽軍國事司書右丞相樞密使領經筵事都總裁臧等奉

勅修

狄棐

子道度

郎簡

孫祖德

張若谷

石揚休

祖士衡

李垂

張洞

李仕衡

李溥

胡則

薛顏

許元

鍾離瑾

孫冲

崔嶧

田瑜

施昌言

狄棐字輔之潭州長沙人少隨父官徐州以文謁路振振器愛之妻以女舉進士甲科以大理評事知分

宜縣歷開封府司錄知壁州道長安為寇準所厚準  
復入相乃薦通判益州擢開封府判官歷京西益州  
路轉運江淮制置發運使累遷太常少卿知廣州加  
直昭文館代還不以南海物自隨人稱其廉拜右諫  
議大夫龍圖閣直學士權判吏部流內銓出知滑州  
進給事中徙天雄軍會給郊賞帛不善士卒譁諫趣  
府門棊不能治事聞命侍御史劉夔按視未及境衆  
不自安棊馳白夔請給以行河事夔至與轉運使李  
絳誅首惡數人棊坐罷懦降知隨州徙同州凶當三  
班院進樞密直學士歷知陝鄭州河中河南府復判

流內銓出知揚州未行卒有狄國賓者仁傑之後分  
仁傑告身與裴裴奏錄國賓一官而自稱仁傑十四  
世孫裴在河中時有中貴人過郡言將援裴於上前  
裴荅以他語退謂所親曰吾湘潭一寒士今官侍從  
可以老而自污耶其為政愷悌不為表暴死之日家  
無餘貲子遵度字元規少穎悟篤志於學每讀書意  
有所得即仰屋瞪視人呼之弗聞也少舉進士一斤  
於有司恥不復為以父任為襄縣主簿居數月棄去  
好為古文著春秋雜說多所發明嘗患時學靡敝作  
擬皇太子冊文除侍御史制裴晉公傳人多稱之尤

三百九十四  
嗜杜甫詩嘗讚其集一夕夢見甫為誦世所未見詩  
及覺纔記十餘字遵度足成之為佳城篇後數月卒  
有集十二卷

郎簡字叔廉杭州臨安人幼孤貧借書錄之多至成  
誦進士及第補試秘書省校書郎知寧國縣徙福清  
令縣有石塘陂歲久湮塞募民浚築溉廢田百餘頃  
邑人為立生祠調隨州推官及引對真宗曰簡歷官  
無過而無一人薦是必恬於進者特改秘書省著作佐  
郎知分宜縣徙知竇州縣吏死子幼贅婚偽為券冒  
有其貲及子長屢訴不得直乃訟于朝下簡劾治簡

示以舊牘曰此爾翁書耶曰然又取偽券示之弗類也始伏罪徙藤州興學養士一變其俗藤自是始有舉進士者通判海州提點利州路刑獄官罷知泉州累遷尚書度支員外郎廣南東路轉運使擢秘書少監知廣州捕斬賊馮佐臣入判大理寺出知越州復歸判尚書刑部出知江寧府歷右諫議大夫給事中知揚州徙明州以尚書工部侍郎致仕任明堂遷刑部卒年八十有九特贈吏部侍郎簡性和易喜賓客即錢塘城北治園廬自號武林居士道引服餌晚歲顏如丹尤好醫術人有疾多自處方以療之有集驗方



數十行于世一日謂其子絜曰吾退居十五年未嘗  
小不懌今意倦豈不逝歟就寢而絕幼從學四明朱  
頔長學文於沈天錫既仕均奉資之後二人亡又訪  
其子孫為主婚嫁平居宴語惟以宣上德救民患為  
意孫沔知杭州榜其里門曰德壽坊然在廣州無廉  
稱蓋為絜所累絜終尚書都官員外郎

孫祖德字延仲濰州北海人父航監察御史淮南轉  
運祖德進士及第調濠州推官校勘館閣書籍時校  
勘官不為常職滿歲而去改大理寺丞知榆次縣上  
書言刑法重輕以尚書屯田員外郎通判西京留守

司方冬苦寒詔罷內外工作而錢惟演督修天津橋  
格詔不下祖德曰詔書可稽留耶卒白罷役入為殿  
中侍御史遷侍御史章獻太后春秋高疾加劇祖德  
請還政已而疾少間祖德大恐及太后崩諸嘗言還  
政者多進用遂擢尚書兵部員外郎兼起居舍人知  
諫院言郭皇后不當廢獲罪以贖論久之遷天章閣  
待制時三司判官許申因宦官閤文應獻計以藥化  
鐵成銅可鑄錢裨國用祖德言偽銅法所禁而官自  
為是教民欺也固爭之出知兗徐蔡州永興軍徙鳳  
翔府請置鄉兵改龍圖閣直學士知梓州累遷右諫

議大夫知河中府歷陳許蔡潞鄆亳州應天府以疾  
得潁州除吏部侍郎致仕卒有論事七卷祖德少清  
約及致仕娶富人妻以規有其財已而妻悍反資以  
財而出之子珪江東轉運使

張若谷字德繇南劔沙縣人進士及第為巴州軍事  
推官會蜀寇掠隣郡若谷攝州事率衆為守禦備賊  
乃引去調全州軍事推官入見真宗識其名顧曰是  
嘗在巴州禦賊者耶特改大理寺丞知濠陽縣三司  
言廣寧監歲鑄緡錢四十萬其主監宜擇人乃以命  
若谷歲餘所鑄贏三十萬緡擢知虔州歷江湖淮南

益州路轉運江淮制置發運使入為三司度支鹽鐵  
副使累遷右諫議大夫知并州先是麟府歲以繒錦  
市蕃部馬前守輒罷之若谷以謂互市所以利戎落  
而通邊情且中國得戰馬亟罷之則猜阻不安奏復  
市如故而馬入歲增提舉諸司庫務權判大理寺進  
樞密直學士歷知澶州成德軍揚州江寧府入知審  
官院糾察在京刑獄知通進銀臺司應天府改龍圖  
閣學士徙杭州會歲飢斥餘廩為糜粥賑救之權判  
吏部流內銓知洪州累官至尚書左丞致仕若谷素  
為宰相張士遜引拔然所至亦自有循良跡不激訐

三百九十二个  
取名云

石揚休字昌言其先江都人唐兵部郎中仲覽之後  
後徙京兆七代祖藏用右羽林大將軍明於曆數嘗  
召家人謂曰天下將有變而蜀為最安處乃去依其  
親眉州刺史李漉遂為眉州人揚休少孤力學進士  
高第為同州觀察推官遷著作佐郎知中年縣縣當  
國西門衣冠往來之衝也地瘠民貧賦役煩重富人  
隸太常為樂工僥倖免役者凡六十餘家揚休請悉  
罷之改秘書丞為秘閣校理開封府推官累遷尚書  
祠部員外郎歷三司度支鹽鐵判官坐前在開封嘗

失盜出知宿州頃之召入為度支判官修起居注初  
記注官與講讀諸儒皆得侍坐邇英閣揚休奏史官  
記言動當立以侍從其言判鹽鐵內院以刑部員外  
郎知制誥同判太常寺初內出香祠溫成廟帝誤書  
名稱臣揚休言此奉宗廟禮有司承誤不以聞帝嘉  
之兼尙當三班院為宗正寺修玉牒官遷工部郎中  
未及謝卒揚休喜開放平居養猿鶴玩圖書吟詠自  
適與家人言未嘗及朝廷事及卒發楮中所得上封  
事十餘章其大畧請增諫官以廣言路置五經博士  
使學者專其業出御史按察諸道以防壅蔽復齒胄

之禮以強宗室擇守令重農桑禁奢侈皆有補於時者然揚休為人慎默世未嘗以能言待之也至於誥命尤非所長平生好殖財因使契丹道感寒毒得風痺謁告歸鄉別墳墓揚休初在鄉時衣食不足徒步去家十八年後以從官還鄉里疇昔同貧窶之人尚在皆曰昌言來必賙我矣揚休卒不揮一金反遍受里中富人金以去

祖士衡字平叔蔡州上蔡人少孤博學有文為李宗諤所知妻以兄子楊億謂劉錡曰祖士衡辭學日新後生可畏也舉進士甲科授大理評事通判蘄州再

遷殿中丞直集賢院改右正言戶部判官未幾提舉  
在京諸司庫務遷起居舍人注釋御集檢閱官遂知  
制誥為史館修撰糾察在京刑獄同知通進銀臺司  
天聖初以附丁謂落職知吉州言者又以在郡不修  
飭復降監江州稅士衡兒時過外家有僧善相見之  
語人曰是兒神骨秀異他日有名于時若年過四十  
當位極人臣年三十九卒于官

李垂字舜工聊城人咸平中登進士第上兵制將制  
書自湖州錄事叅軍召為崇文校勘累遷著作郎館  
閣校理上導河形勝書三卷欲復九河故道時論重



之又累修起居注丁謂執政垂未嘗往謁或問其故  
垂曰謂為宰相不以公道副天下望而恃權怙勢觀  
其所為必遊朱崖吾不欲在其黨中謂聞而惡之罷  
知亳州遷潁晉絳三州明道中還朝閣門祇候李康  
伯謂曰舜工文學議論稱於天下諸公欲用為知制  
誥但宰相以舜工未嘗相識盍一往見之垂曰我若  
昔謁丁崖州則乾興初已為翰林學士矣今已老大  
見大臣不公常欲面折之焉趨炎附熱看人眉睫以  
冀推輓乎道之不行命也執政知之出知均州卒年  
六十九五子仲昌最知名銳於進取嘗獻計修六塔

河無功自殿中丞責英州文學參軍

張洞字仲通開封祥符人父惟簡太常少卿洞為人長大眉目如畫自幼開悟卓犖不群惟簡異之抱以訪里之卜者曰郎君生甚奇必在策名後當以文學政事顯既誦書日數千言為文甚敏未冠嘩然有聲遇事慷慨自許以有為時趙元昊叛擾邊關隴蕭然困於飛輓且屢喪師仁宗太息思聞中外之謀洞以布衣求上方略召試舍人院擢試將作監主簿尋舉進士中第調連水軍判官遭親喪去再調潁州推官民劉甲者強弟擄使鞭其婦既投杖夫婦相持而泣甲

怒逼柳使再鞭之婦以無罪死吏當夫極法知州歐陽脩欲從之洞曰律以教令者為首夫為從且非其意不當死衆不聽洞即稱疾不出不得已獻於朝果如洞言脩甚重之晏殊知永興軍奏管句機宜文字殊儒臣喜客游其門者皆名士尤深敬洞改大理丞知鞏縣會殊留守西京復奏知司錄殊晚節驟用刑幕府無敢言洞平居與殊賦詩飲酒傾倒無不至當事有官責持議甚堅殊為沮止洞亦自以不負其知樞密副使高若訥參知政事吳育薦其文學宜為館職召試學士院充秘閣校理判祠部時天下戶口日

蕃民去為僧者衆洞奏至和元年敕增歲度僧舊敕  
諸路三百人度一人後率百人度一人又文武官內  
臣墳墓得置寺撥放近歲滋廣若以勲勞宜假之者  
當依古給戶守冢禁毋樵採而已今祠部帳至三十  
餘萬僧失不裁損後不勝其弊朝廷用其言始三分  
減一知太常禮院宰相陳執中將葬洞與同列謚為  
榮靈其孫訴之詔孫抃等復議改曰恭洞駁奏執中  
位宰相無功德而罪戾多生不能正法以黜之死猶  
當正名以誅之竟從抃等議初皇后郭氏忤旨得罪  
廢沒後仁宗悔之詔追復其號二十餘年矣至是有

四百九十一  
司請祔於廟知制誥劉敞以謂春秋書禘于太廟用致夫人致者不宜致也且古者不二嫡當許其號不許其禮洞奏后嘗母天下無大過惡中外所知陛下既察其偶失恭順洗之於既沒猶曰不許其禮於義無當且廢后立后何嫌於嫡此當時大臣護已然之失乖正名之典而敞復引春秋用致夫人按左氏哀姜之惡所不忍道而二傳有非嫡之辭敞議非是若從變禮尚當別立廟不行轉太常博士判登聞鼓院仁宗方嚮儒術洞在館閣久數有建明仁宗以為知經會覆致進士崇政殿因賜飛白善經字寵之洞獻

詩謝復賜詔獎諭出知棣州轉尚書祠部員外郎河  
北地當六塔之衝者歲決溢病民田水退强者遂冒  
占弱者耕居無所洞奏一切官為標給蠲其租以綏  
新集河北東路民富蚕桑契丹謂之綾絹州朝廷以  
為內地不慮洞奏今滄景契丹可入之道兵守多缺  
契丹時以販鹽為名舟往來境上此不可不察願度  
形勢置帥增屯戍以控扼之時天下久安薦紳崇尚  
虛名以寬厚沉默為德於事無所補洞以謂非朝廷  
福又謂諫官持諫以震人主不數年至顯仕此何為  
者當重其任而緩其遷使端良之士不亟易而浮躁

者絕意致書歐陽脩極論之召權開封府推官英宗  
即位轉度支員外郎英宗哀疚或經旬不御正殿洞  
上言陛下春秋鼎盛初嗣大統豈宜久屈剛健自比  
冲幼之主當躬萬機攬群材以稱先帝付畀之意厭  
元元之望大臣亦以為言遂聽政命攷試開封進士  
既罷進賦題曰孝慈則忠時方議濮安懿王稱皇事  
英宗曰張洞意諷朕宰相韓琦進曰言之者無罪聞  
之者足以戒英宗意解詔訊祈國公宗說獄宗說恃近  
屬貴驕不道獄具英宗以為辱國不欲暴其惡洞曰  
宗說罪在不宥雖然陛下將懲惡而難暴之獨以其

坑不辜數人置諸法可矣英宗喜曰卿知大體洞因  
言唐宗室多賢宰相名士蓋其知學問使然國家本  
支蕃衍無親踈一切厚廩之不使知辛苦婢妾聲伎  
無多寡之限至滅禮義極嗜欲貨之則亂公共之法  
刑之則傷骨肉之愛宜因秩品立制度更選老成教  
授之宗室緣是怨洞痛詆訾言上亦起藩邸賴察之  
不罪也轉司封員外郎權三司度支判官對便殿稱  
旨英宗遂欲進用大臣忌之出為江西轉運使江西  
荐飢徵民積歲賦洞為奏免之又民輸油絹不中度  
者舊責以滿匹洞命計尺寸輸錢民便之移淮南轉



三十九  
運使轉工部郎中淮南地不宜麥民艱於所輸洞復  
命輸錢官為糴麥不踰時而足洞在棣時夢人稱敕  
召者既出如拜官然顧視旌旗吏卒羅于庭至是夢  
之如初自以年不能永教諸子部分家事未幾卒年  
四十九

李仕衡字天均秦州成紀人後家京兆府進士及第  
調鄠縣主簿由重進守京兆命仕衡鞫死囚五人活  
者四人重進即其家謂曰子有陰施此門當高天之  
徙知彭山縣就加大理評事遷光祿寺丞父益以不  
法誅仕衡亦坐除名後會赦冠準薦其材盡復其官

領渭橋輦運通判邠州再遷秘書丞徙知劔州王均  
反仕衡度州兵不足守即棄城焚芻粟輦金帛東守  
劔門既而賊陷漢州攻劔州州空無所資即趨劔門  
仕衡預招賊衆得千餘人待之不疑賊將至與鈐轄  
裴臻迎擊之斬首數千級乃乘驛入奏擢尚書度支  
員外郎賜服緋魚已而使者言仕衡嘗棄城降監虔  
州稅召還判三司鹽鐵內院度支使梁鼎言商人入  
粟于邊率高其直而售以解鹽商利益博國用日耗  
請調丁夫轉粟而輦鹽諸州官自鬻之歲可得緡錢  
三十萬仕衡曰安邊無大於息民今不得已而調斂

之又增以轉粟輓鹽之後欲其不困何可得哉不聽  
遂行鼎議而關中大擾乃罷鼎度支使以仕衡為荆  
湖北路轉運使徙陝西初歲出內帑緡錢三十萬助  
陝西軍費仕衡言歲計可自辦遂罷給真宗謁陵寢  
因幸洛仕衡獻粟五十萬斛又以三十萬斛餽京西  
朝廷以為材召為度支副使上言關右既弛鹽禁而  
永興同華耀四州猶率賣鹽年額錢請減十之四詔  
悉除之累遷司封郎中為河北轉運使又奏罷內帑  
所助緡錢百萬建言河北歲給諸軍帛七十萬而民  
艱於得錢悉預假於里豪出倍償之息以是工機之

利愈薄方春民不足請戶給錢至夏輸帛則民獲利而官用足矣詔優其直仍推其法于天下封泰山獻錢帛芻糧各十萬見于行宮遷右諫議大夫祀汾陰又助錢帛三十萬乃命同林特提舉西京陝西轉運事權知永興軍進給事中踰月以樞密直學士知益州頃之河北闕軍儲議者以謂仕衡前過助封祀費真宗聞之以為河北都轉運使駕如亳州又貢絲綿縑帛各二十萬後集粟塞下至鉅萬斛或言粟腐不可食朝廷遣使取視之而粟不腐也棣州污下苦水患士衡奏徙州西北七十里既而大水沒故城丈餘

南郊復進錢帛八十萬先是每有大禮仕衡必以所部供軍物為貢言者以為不實仕衡乃條折進六十萬皆上供者二十萬即其羨餘帝不之罪謂王旦曰仕衡應猝有材人欲以此中之然朝廷所須隨大小即辦亦其所長也明年旱蝗發積粟賑民又移五萬斛濟京西遷尚書工部侍郎權知天雄軍民有盜瓜傷主者法當死仕衡以歲飢奏貸之盜起淄青間遷刑部侍郎知青州前守捕群盜妻子寘棘園中仕衡至悉縱罷之使去未幾其徒有梟賊首至者入為三司使帝作寬財利論以賜之乃更陝西入粟法使民

得受錢與茶舊市羊及木責吏送京師而羊多道死  
木至湍險處往往漂失吏至破產不能償仕衡乃許  
吏私附羊免其筭使得補死者聽民自採木輸官用  
入粟法償其直遷吏部侍郎仁宗即位拜尚書左丞  
以足疾改同州觀察使知陳州州大水築大隄以障  
水患徙潁州復知陳州曹利用仕衡婿也利用被罪  
降仕衡左龍武軍大將軍分司西京歲餘改左衛大  
將軍卒其後諸子訴其父有勞於國非意左遷詔追  
復同州觀察使仕衡前後管計事二十年雖才智過  
人然素貪家貲至累鉅萬建大第長安里中嚴若官

府子丕緒蔭補將作監主簿及仕衡歸老丕緒時為尚書虞部員外郎請解官就養朝廷以為郎故事不許請削一官乃聽未幾還之居十餘年仕衡死服除久之不出大臣為言起僉書永興軍節度判官事歷通判永興軍同州知解州興元府華州累遷司農卿致仕卒丕緒居官廉靜不為矯激家多圖書集歷代石刻為數百卷藏之

李溥河南人初為三司小吏陰狡多智數時天下新定太宗厲精政事嘗論及財賦欲有所更革引三司吏二十七人對便殿問以職事溥詢其目請退而條

上命至中書列七十一事以聞四十四事即日行之  
餘下三司議可否於是帝以溥等為能語輔臣曰朕  
嘗論陳恕等如溥輩雖無學至於金穀利害必能究  
知本末宜假以色辭誘令開陳而恕等強復自用莫  
肯詢問呂端對曰耕當問奴織當問婢寇準曰孔子  
入太廟每事問蓋以貴下賤先有司之義也帝以為  
然悉擢溥等以官賜錢幣有差溥為左侍禁提點三  
司孔目官請著內外百官諸軍奉祿為定式加閣門  
祇候催運陝西糧草赴清遠軍還提舉在京倉草場  
勾當北作坊齊州大水壞民廬舍欲徙州城未決命



溥往視遂徙城而還又與李仕衡使陝西增酒權緡  
錢歲二十五萬三遷崇儀使景德中茶法既弊命與  
林特劉承珪更定法募入金帛京師入芻粟塞下  
與東南茶皆倍其數即以溥制置江淮等路茶鹽礬  
稅兼發運事使推行之歲課緡錢果增其舊特等皆  
受賞溥時已為發運副使遷為使仍改西京作坊使  
然茶法行之數年課復損於舊江淮歲運來輸京師  
舊止五百餘萬斛至溥乃增至六百萬而諸路猶有  
餘畜高郵軍新開湖水散漫多風濤溥令漕舟東下  
者還過泗州因載石輸湖中積為長隄自是舟行無

患累遷北作坊使時營建玉清昭應宮溥與丁謂相表裏盡括東南巧匠遣詣京且多致竒木恠石以溥會帝意建安軍鑄玉皇聖祖溥典其事丁謂言溥蔬食者周歲而溥亦數奏祥應遂以為迎奉聖像都監領順州刺史遷獎州團練使溥自言江淮歲入茶視舊額增五百七十餘萬斤并言漕舟舊以使臣若軍大將人掌一網多侵盜自溥併三網為一以三人共主之使更相司察大中祥符九年初運米一百二十五萬石纔失二百石會溥當代詔留再任特遷宮苑使初譙縣尉陳齊論權茶法溥薦齊任京官御史中

丞王嗣宗方判吏部銓言齊豪民子不可用真宗以  
問執政馮拯對曰若用有材豈限貧富帝曰卿言是  
也因稱溥畏慎小心言事未嘗不中利害以故任之  
益不疑然溥久專利權內倚丁謂所言輒聽帝嘗語  
執政曰群臣上書論事法官輒沮之云非有大益無  
改舊章然則何以廣言路王旦對曰法制數更則詔  
令牴牾故重於變易因言溥嘗請盜販茶鹽者贓仗  
皆沒官已可之矣帝曰此特畏溥之強不敢退卻自  
今雖小吏言亦宜詳究行之溥既專且貪繇是寢為  
不法發運使黃震條其罪狀以聞罷知潭州命御史

鞠治得溥私役兵為姻家林特起第附官舟販竹木  
奸賊十數事未論決會赦貶忠武軍節度副使仁宗即  
位起知淮陽軍歷光黃二州復以賊敗貶蔡州團練  
副使久之監徐州利國監以千牛衛將軍致仕卒  
胡則字正婺州永康人果敢有材氣以進士起家  
補許田縣尉再調憲州錄事參軍時靈夏用兵轉運  
使索湘命則部送芻糧為一月計則曰為百日備尚  
恐不支柰何為一月邪湘懼無以給遣則遂入奏太  
宗因問以邊策對稱旨顧左右曰州縣豈乏人命記  
姓名中書後李繼隆討賊久不解湘語則曰微子幾

敗我事一日繼隆移文轉運司曰兵且深入糧有繼乎則告湘曰彼師老將歸欲以糧乏為辭耳姑以有餘報之已而果為則所料湘為河北轉運使奏改秘書省著作佐郎僉書貝州觀察判官事後以太常博士提舉兩浙權茶就知睦州徙温州歲餘提舉江南路銀銅場鑄錢監得吏所匿銅數萬斤吏懼且死則曰馬伏波哀重囚而縱之吾豈重貨而輕數人之生乎籍為羨餘不之罪改江淮制置發運使累遷尚書戶部員外郎真宗幸亳還擢三司度支副使初丁謂舉進士客許田則厚遇之謂貴顯故則驟進用至是

謂罷政事出則為京西轉運使遷禮部郎中部內民  
訛言相驚至遣使安撫乃定坐是徙廣西路轉運使  
有番舶遭風至瓊州且告食乏不能去則命貸錢三  
百萬吏白夷人狡詐又風波不可期則曰彼以急難  
投我可拒而不與邪已而償所貸如期又按宜州重  
辟十九人為辦活者九人復為發運使累遷太常少  
卿乾寧初坐丁謂黨降知信州徙福州以右諫議大  
夫知杭州入權吏部流內銓坐失舉復為太常少卿  
知池州未行復諫議大夫知永興軍徙河北都轉運  
使以給事中權三司使通京東西陝西鹽法人便之

初則在河北殿中侍御史王沘嘗就則假官舟販鹽  
又以其子為名祈買酒場至是張宗誨擿發之按驗  
得實出則知陳州踰月授工部侍郎集賢院學士劉  
隨上疏言則奸邪貪濫聞天下比命知池州不肯行  
今以罪去驟加美職何以風勸在位後徙杭州再遷  
兵部侍郎致仕卒則無廉名喜交結尚風義丁謂貶  
崖州賓客隨散落獨則間遣人至海上饋問如平日  
在福州時前守陳絳嘗延蜀人龍昌期為衆人講易  
得錢十萬絳既坐罪遂自成都械昌期至則破械館  
以賓禮出俸錢為償之昌期者嘗註易詩書論語孝

經陰符經老子其說詭誕穿鑿至詆斥周公初用薦者補國子四門助教文彥博守成都召置府學奏改秘書省校書郎後以殿中丞致仕著書百餘卷嘉祐中詔取其書昌期時年八十餘野服自詣京師賜緋魚絹百匹歐陽脩言其異端害道不當推獎奪所賜服罷歸卒

薛頴字彥回河中萬泉人舉三禮中第為嘉州司戶參軍代還引見太宗頴問之對稱旨改將作監丞監華州酒稅以秘書省著作佐郎使夔峽疏決刑獄還改太子左贊善大夫知雲安軍徙渝閬二州擢三司



鹽鐵判官河北計置糧草初丁謂招撫溪蠻有威惠  
部人愛之留五年詔謂自舉代謂薦顏為峽路轉運  
使累遷尚書虞部員外郎始孟氏據蜀徙夔州于東  
山據峽以拒王師而民居不便也顏為復其故城宜  
州陳進反命勾當廣南東西路轉運司事賊平遷金  
部員外郎改河東轉運使祀汾陰徙陝西河中浮橋  
歲為水所敗顏即北岸驪上流為支渠以殺水怒因  
取渠水漑其旁田民頗利之坊州募人鍊礬歲久課  
益重至有破產被繫不能償者顏奏罷坊礬則晉礬  
當大售後如其策徙河北歷知河陽抗徐州累遷先

祿少卿以少府監知江寧府邏者晝劫人反執平人以告顏視其色動曰若真盜也械之果引伏轉右諫議大夫知河南府仁宗即位遷給事中丁謂分司西京以顏雅與善徙知應天府又徙耀州部有豪姓李甲結客數十人號沒命社少不如意則推一人以死鬪之積數年為鄉人患莫敢發顏至大索其黨會赦當免特杖甲流海上餘悉籍于軍以光祿卿分司西京卒于家嘗屬杜衍為墓誌衍却之仁宗聞其事他日謂衍曰薛顏有醜行卿不欲誌其墓誠清識也孫向自有傳

許元字子春宣州宣城人以父蔭為太廟齋郎改大理寺丞累遷國子博士監在京權貨務三門發運判官元為吏強敏尤能商財利慶曆中江淮歲漕不給京師乏軍儲參知政事范仲淹薦元可獨倚辦擢江淮制置發運判官至則悉發瀕江州縣蔽粟所在留三月食遠近以次相補引千餘艘轉漕而西未幾京師足食朝廷以為任職就遷副使遂以尚書主客員外郎為使進金部特賜進士出身遷侍御史嘗欲與施昌言分行二浙江南調發軍食仁宗聞之語輔臣曰東南歲比不登民力匱乏嘗詔損歲漕百萬石

而元與昌言乃更欲分道而出是必誅求疲民以自  
為功非朕志也下詔戒飭既而元欲專六路財賦收  
羨餘以媚三司憚諸部不從請以六路轉運司自隸  
既可之矣而轉運使多論其罪事遂寢擢天章閣待  
制再遷郎中以疾請還歷知揚越秦州卒元在江淮  
十三年以聚斂刻剝為能急於進取多聚珍竒以賂  
遺京師權貴尤為王堯臣所知發運使治所在真州  
衣冠之求官舟者日數十輩元視勢家貴族立權巨  
艦與之即小官惇獨伺候歲月有不能得人以是憤  
然而元自以為當然無所愧憚

鍾離瑾字公瑜廬州合肥人舉進士為簡州推官以  
殿中丞通判益州建言州郡既上雨後雖凶旱多隱  
之以成前奏請令監司劾其不實者擢開封府推官  
出提點兩浙刑獄衢潤州飢聚餓者食之頗廢農作  
請發米二萬斛賑給家毋過一斛後徙淮南轉運副  
使歷京西河東河北轉運使改江淮制置發運使殿  
直王乙者請自揚州召伯埭東至瓜州濬河百二十  
里以廢二埭詔瑾規度以工大不可就止置牓召伯  
埭旁人以為利累遷尚書刑部郎中為三司戶部副  
使除龍圖閣待制權知開封府未踰月得疾仁宗封

藥賜之使未及門而卒

孫冲字升伯趙州平棘人舉明經歷古田青陽尉鹽  
山麗水主簿嘗併喪父母去官有司循五代故事必  
六年乃聽調冲援古制以書干宰相不納後舉進士  
登甲科授將作監丞歷通判晉絳保州坐與保州守  
爭事降監吉州酒累遷太常博士河決棣州知天雄  
軍寇準請徙州治河命冲往按視還言徙州動民亦  
未免治堤不若塞河為便遂以冲知棣州自秋至春  
凡四决冲皆塞之就除殿中侍御史準為樞密使卒  
徙州信陽而冲坐守護河堤過嚴民輸送往來堤上

者輒榜之為使者論奏徙知襄州冲復上疏論徙州  
非便著河書以獻會京西蝗真宗遣中使督捕至襄  
怒冲不出迎乃奏蝗唯襄為甚而州將日置酒無卹  
民意帝怒命即州置獄冲得屬縣言歲稔狀馳驛上  
之時使者猶未還帝悟為追使者答之以侍御史為  
京西轉運塞滑州決河權知滑州參知政事魯宗道  
總河事用太常博士李渭策欲盛夏興役冲言徒費  
薪楫困人力雖塞必決遂罷知河陽累遷刑部郎中  
歷湖北河東轉運使會南郊賞賜軍士而汾州廣勇  
軍所得帛不逮他軍一軍大譟捧守佐堂下劫之約

與善帛乃免城中戒備遣兵圍廣勇營冲適至命解  
圍弛備置酒張樂推首惡十六人斬之遂定初守佐  
以亂軍所約者上聞詔給善帛使者至潞冲促之還  
曰以亂而得所欲是愈誘之亂也卒留不與入判登  
聞鼓院以目疾改兵部郎中直史館知河中府徙潞  
州復為河東轉運使遷太常少卿擢右諫議大夫復  
知潞州遷翰林院學士及徙同州權西京留司御史  
臺遷給事中喪明卒冲為吏所至以強幹稱能任鈞  
距多得事情然無家法晚節尤寡廉聲孫永自有傳  
崔暉字之才京兆長安人進士及第累官尚書職方



員外郎知遂州建議瞿塘峽置關如劔門以察奸人  
事既施行徙提點刑獄嘉陵江歲調民丁治堤塌嶧  
更用州兵代其役文州蕃卒數剽攻邊戶守臣慮生  
事多<sup>以</sup>酒和遣嶧請守臣歲時得行邊益募勇壯伺  
其發一切捕擊之後無復內寇就除轉運使歷三司  
戶部判官河東轉運使會更錢法潞州民大擾推其  
首惡誅之人心遂定後為戶部副使以右諫議大夫  
為河東都轉運使遷給事中還糾察在京刑獄諫官  
御史言宰相陳執中縱嬖妾殺婢命按治嶧以為執  
中自以婢不恪笞之死非妾殺之頗左右執中即授

龍圖閣待制知慶州羗井坑族亂潛兵討平歷知同  
州鳳翔府改工部侍郎集賢院學士知河中府驛所  
至貪奸比老益甚在鳳翔轉運使薛向按之急不得  
已至河中請老以刑部侍郎致仕卒

田瑜字資忠河南壽安人舉進士歷袁郢合三州軍  
事推官遷大理寺丞知鹿邑建陽縣徙知蒙江二州  
累遷尚書司封員外郎提點廣南西路刑獄慶曆中  
歐希範誘溪洞環州蠻叛上以瑜習知南方事就除  
荆湖北路轉運使瑜檄屬郡募民擊賊又督轉粟以  
守要害故兵所至皆不乏食賊勢大挫徙兩浙轉運

按察使杭州龍山堤歲決水冒民居輒賦芻塞之瑜  
與民約每芻十束更輸石一尺率五歲得石百萬為石  
堤堤固而歲不調民加直史館益州路轉運使改江  
淮制置發運使擢天章閣待制知廣州累遷諫議大  
夫權三司戶部副使儂智高犯邕瑜條上用兵禦賊  
十事智高平召對便殿具言南方山川險要所以備  
守之策乃以為廣南東路體量安撫使還糾察刑獄  
同判吏部流內銓除龍圖閣直學士知青州城中有  
殺人投屍井中者吏以其無主名不以聞瑜廉得之  
大出金帛購賊後數日隣州民執賊以告屬歲凶多

盜瑜立賞罰設方略捕格之境中肅然徙知澶州背  
發疽卒瑜謹厚少文而於吏事頗盡心然御下急無  
廉稱

施昌言字正臣通州靜海人舉進士高第授將作監  
丞通判滁州後以太常博士召試館職不中選遷尚  
書屯田員外郎知太平州上政論三十篇入為殿中  
侍御史開封府判官安撫淮南還以禮部員外郎兼  
侍御史知雜事遷三司度支副使除天章閣待制河  
北都轉運使言事者以為濱棣等六州河可涉宜有  
城守如邊以待契丹詔昌言與宦官楊懷敏往視懷



召還會塞六塔河以為都大修河制置使辭弗許加  
樞密直學士知澶州以便役事河決奪一官知滑州  
又知杭州加龍圖閣學士復知滑州以老求罷乃以  
知越州至京師卒昌言為發運使時召范仲淹後堂  
出婢子為優雜男子慢戲無所不言仲淹恠問之則  
皆昌言子也仲淹大不懌而去其治家如此

論曰狄棐郎簡孫祖德張若谷石揚休祖士衡並以  
文辭高第累侍從歷方州始為名臣終鮮大過考其  
行事可見也李垂寧去華近不肯見宰相張洞以直  
言正論為大臣所忌則其抱負從可知矣若李仕衡

而下十人皆能任劇繁然或寡廉稱或有醜行君子恥

之事下其立率毒寧去華或不肯良率味謝同以有

文翰高深累科於瑟衣以故勝存百然讓大銀美其

列傳卷第五十八

昔昌言七也中奪大不對而去其合宋咬此

出戰于為聖聯與于對建無他不言中奪在問之明

味妙似至京相卒昌言為總更製制台之中奪美其

又味就出吹齋圖閣學士製味骨以久苦外羅以久

冊落直學士味直以久更吳率何先善一官味骨以

呂累會塞六卷何久善雅大為何備置更韓味持吹

列傳卷第五十九

宋史三百

開府儀同三司、精國器、國事、前書左丞、相、樞密、領經筵事、都總、秘、脫等本、勅修

楊偕

王公子鼎

杜杞

楊畋

周湛

徐的

姚仲孫

陳太素

馬昌等  
杜曾附

李虛己

張傳

俞獻卿

陳從易

楊大雅

楊偕字次公坊州中部人唐左僕射於陵六世孫父守慶仕廣南劉氏歸朝為坊州司馬因家焉偕少從種放學於終南山舉進士釋褐坊州軍事推官知沂



源縣再調漢州軍事判官道遇術士曰君知世有化  
瓦石為黃金者乎就偕試之既驗欲授以方偕曰吾  
從吏祿安事化金哉術士曰子志若此非吾所及也  
出戶失所之在官數上書論時政又上所著文論召  
試學士院不中改永興軍節度推官又上書論陝西  
邊事復召試不赴即遷秘書省著作佐郎為審刑院  
詳議官再遷太常博士宋綬薦為監察御史改殿中  
侍御史與曹脩古連䟽言劉從德遺奏恩太濫貶太  
常博士監舒州稅以尚書祠部員外郎知光州改侍  
御史為三司度支判官時郭皇后廢偕與孔道輔范

仲淹力爭道輔仲淹既出偕訥言願得與道輔等皆貶不報富民陳氏女選入宮將以為后偕復上疏諫上以尚書戶部員外郎兼侍御史知雜事馬季良以罪斥置滁州自言得致仕偕以謂致仕用優賢者不當以寵罪人又數論陞降之弊仁宗嘉納之判吏部流內銓徙三司度支副使擢天章閣待制河北轉運使按知定州夏守恩贓數萬守恩流嶺南明年丁母憂願終制不許進龍圖閣直學士知河中府元昊反劉平石元孫戰沒偕聞乃偽為書馳告延州曰朝廷遣救兵十萬至矣命傍郡縣大具芻糧什器以

俟比書至賊已解去夏竦為陝西經畧使請增置土  
兵易戍兵歸衛京師偕言方關中財用乏復增土兵  
徒耗國用今賊勢方盛雖大增土兵亦未能減戍兵  
東歸第竦懼敗事欲以兵少為解爾竦復奏偕不忠  
沮邊計偕爭愈力時陝西議立五保偕又以為擾民  
疏請罷之徙陝州又徙河東都轉運使詔大選三路  
之民募為兵偕復言方今兵不為少苟多而不練則  
其勢易以敗又困國而難供時論者惟務多兵而偕  
論常如此進樞密直學士知并州及元昊入寇密詔  
偕選強壯萬人策應麟府偕奏出師臨陣無紀律則

士不用命今發農卒赴邊慮在路逸及臨陣退縮  
不稟號令請以軍法從事詔如所請并人大驚畏都  
轉運使文彥博奏罷之有中官預軍事素橫前帥優  
遇之偕至一繩以法命率所部兵從副總管赴河外  
戒曰遇賊將戰一稟副總管節度中人不服捧檄訴  
偕叱曰汝知違主帥命即斬首乎監軍怖汗不覺墮  
笏翌日告疾未幾遂卒於是軍政肅然元昊大掠河  
北詔脩寧遠砦偕言寧遠砦在河外介麟豐二州之  
間無水泉可守請建新麟州於嵐州有白塔地可建  
砦屯兵謂遷有五利不遷有三害省國用惜民力利

一也內禦崑崙石府州沿河一帶賊所出路利二也我據其要則河水雖合賊不敢逾河而東利三也商旅往來以通貨財利四也方河凍時得所屯兵馬五七千人以張軍勢利五也今麟州轉輸東芻斗粟費直千錢若因循不遷則河東之民困於調發無已時害一也以孤壘餌敵害二也道路艱阻援兵難繼害三也且州之四面屬羌遭賊驅脅蕩然一空止存孤壘猶四支盡廢首面心腹獨存也今契丹又與西賊共謀待冰合來攻河東若朝廷不思禦捍之計而脩寧遠若是求虛名而忽大患也況靈夏二州皆漢唐

郡一旦棄之一麟州何足惜哉書奏帝謂輔臣曰麟  
州古郡也咸平中嘗經寇兵攻圍非不可守今遽欲  
棄之是將退而以河為界也宜諭偕速脩復寧遠以  
援麟州明年改左司郎中本路經畧安撫招討使賜  
錢五十萬偕列六事于朝一罷中人預軍事二徙麟  
州三以便宜從事四出冗師五募武士六專捕援且  
能用臣言則受命不然則已朝廷不從偕累奏不已  
乃罷知邢州徙滄州求面論兵事召還令間日入對  
偕在并州日嘗論八陣圖及進神楯劈陣刀其法外  
環以車內比以楯至是帝命以步卒五百如其法布

陣于庭善之乃下其法於諸路其後王吉果用偕刀  
楯敗元昊於兔毛川久之遷翰林侍讀學士知審官  
院復以為左司郎中元昊乞和而不稱臣偕以謂連  
年出師國力日蹙宜權許之徐圖誅滅之計諫官王  
素歐陽脩蔡襄累章劾奏偕職為從官不思為國討  
賊而助元昊不臣之請罪當誅陛下未忍加戮請出  
之不宜留處京師帝以其章示偕偕不自安乃求知  
越州道改杭州時襄謁告過杭而輕遊里市或謂偕  
合言於朝對曰襄嘗緣公事抵我我豈可以私報耶  
又上太平可致十象圖還判太常司農寺改右諫議

大夫請老以尚書工部侍郎致仕於其歸特賜宴嘗  
召問賜不拜卒遺奏兵論一篇帝憐之特贈兵部侍  
郎偕性剛而忠朴敢為大言數上書論天下事議者  
以為迂闊難用與人少合尤喜古今兵法有兵書十  
五卷集十卷子忱慥皆有雋才蚤卒

王沿字聖源大名館陶人少治春秋中進士第試秘  
書省校書郎歷知彭城新昌二縣改相州觀察推官  
知宗城縣張知白薦其才擢著作佐郎入為審刑院  
詳議官再遷太常博士上書論漢唐之初兵革纒定  
未暇治邊圉則屈意以講和承平之後我力有餘而



外侮不已則以兵治之孝武之於匈奴太宗之於突厥頡利是也宋興七十年而契丹數侵深趙具魏之間先朝患征調之不已也故屈己與之盟然彼以戈矛為耒耜以剽虜為商賈而我壘不堅兵不練而規規於盟較之間豈久安之策哉夫善禦敵者必思所以務農實邊之計河北為天下根本其民儉嗇勤苦地方數千里古號豐實今其地十三為契丹所有餘出征賦者七分而已魏史起鑿十二渠引漳水溉斥鹵之田而河內饒足唐至德後渠廢而相魏磁洺之地並漳水者累遭決溢今皆斥鹵不可耕故沿邊郡

縣數蠲租稅而又牧監芻地占民田數百千頃是河  
北之地雖十有其七而得賦之實者四分而已以四  
分之力給十萬防秋之師生民不得不困也且牧監  
養馬數萬徒耗芻豢未嘗獲其用請擇壯者配軍衰  
者徙之河南孳息者養之民間罷諸坳牧以其地為  
屯田發後卒刑徒田之歲可用獲穀數十萬斛夫漳  
水一石其泥數斗古人以為利今人以為害繫乎用  
與不用爾願募民復十二渠渠復則水分水分則無  
奔決之患以之灌溉可使數郡瘠鹵之田變為膏腴  
如是則民富十倍而帑廩有餘矣以此馭敵何求而

不可詔河北轉運使規度而通判洺州王軫言漳河  
岸高水下未易疏導又其流濁不可溉田沿方遷監  
察御史即上書駁軫說帝雖嘉之而不即行語在河  
渠志時樞密副使晏殊以笏擊從者折齒知開封府  
陳堯咨判官張宗誨日嗜酒惰事沿皆彈奏之天聖  
五年安撫關陝減諸縣秋稅十二三還為開封府推  
官又體量河朔飢民所至不俟詔發官廩濟之就除  
轉運副使上言本朝制兵刑未幾於古自契丹通好  
三十年二邊常屯重兵坐耗國用而未知所以處之  
請教河北強壯以代就糧禁卒之闕罷招廂軍以其

冗者隸作屯田行之數年禁卒當漸銷減而強壯悉  
為精兵矣古者刑平國用中典而比者以敕處罪多  
重於律以絹估罪者敕以緡直代之律坐髡鈇而役  
者敕黥竄以為卒比諸州上言謫卒太多衣食不足  
願勿復謫者七十餘州以律言之皆不至是是以繁  
文罔之而寘于理也誠願削深文而用正律以錢定  
罪者悉從絹估黥竄為卒者止從髡鈇此所謂勝殘  
去殺無待百年者也被詔鞫曹汭獄于真定府遷殿  
中侍御史母喪服除改尚書工部員外郎知邢州復  
起為河北轉運使奏罷二牧監以地賦民導相衛邢

趙水下天平景祐諸渠溉田數萬頃因詣闕奏事上所著春秋集傳十五卷復上書以春秋論時事授直昭文館為三司戶部副使徙鹽鐵遷兵部員外郎天章閣待制陝西都轉運使時朝廷將減卒戍就食內地詔與知州總管鈐轄等議沿即奏減卒數萬知樞密院李諮以為不可復下沿邊都監議沿上疏曰兵機當在廊廟之上豈可取責小人哉諮惡其言奏罷之降知滑州徙成德軍建學校行鄉飲酒禮遷刑部郎中河東都轉運使加龍圖閣直學士知并州時元昊數寇河東建議徙豐州不報已而州果陷進樞密

直學士右司郎中為涇原路經畧安撫招討使兼知滑州增屯兵城中隘甚乃築西關城五里改涇州觀察使元昊入寇副都總管葛懷敏率兵出捍沿教懷敏率兵據瓦亭待之懷敏進兵鎮戎沿以書戒勿入第背城為砦以羸師誘賊賊至發伏擊之可有功懷敏不聽進至定川果為所敗賊乘勝犯渭州沿率州人乘城多張旗幟為疑兵賊遂引去坐懷敏敗復為龍圖閣直學士刑部郎中知虢州尋降天章閣待制而為權御史中丞賈昌朝所奏落待制未幾徙知成德軍復待制又徙河中府卒沿好建明當世事而其

論多齟齬初興河北水利導諸渠溉民田論者以為  
無益已而邢州民有爭渠水至殺人者然後人知沿  
所建為利嘗論以春秋法斷事然真定之獄人以為  
沿傳致之有文集二十卷唐志二十一卷子鼎

鼎字鼎臣以進士第累遷太常博士王堯臣領三司  
舉勾當公事數上書論時政得失時天子患吏治多  
弛監司不舉職而范仲淹等方執政擇諸路使者令  
按舉不法以鼎提點江東刑獄與轉運使楊紘判官  
王綽競擿發吏至微隱罪無所貸於是所部官吏怨  
之目為三虎仁宗聞之不說後傳惟幾奉使江東戒

以毋效三虎為也仲淹等罷鼎與絃綽皆為人所言  
時鼎提點兩浙刑獄降知深州王則以貝州反深卒  
龐旦與其徒謀以元日殺軍校劫庫兵應之前一日  
有告者鼎夜出檄遣軍校攝事外邑而陰為之備翌  
日會僚吏置酒如常叛黨愕不敢動鼎刺得實徐捕  
首謀十八人送獄獄具俟轉運使至審決未至軍中  
恟恟謀劫囚鼎因謂僚吏曰吾不以累諸君獨命取  
囚桀驁者數人斬于市眾皆失色一郡帖然轉運使  
至囚未決者半訊之皆伏誅明年河北大飢人相食  
鼎經營賑救頗盡力徙建州其俗生子多不舉鼎為



條教禁止時盜販茶鹽者衆一切杖遣之監司數以  
為言鼎弗為變徙提點河北刑獄治奸贓益急所劾  
舉不避貴勢召為開封府判官改鹽鐵判官累遷司  
封員外郎淮南兩浙荆湖制置發運副使內侍楊永  
德奏請沿汴置鋪挽漕舟歲可省卒六萬鼎議以為  
不可永德橫猾執政重違其奏乃令三司判官一員  
將永德就鼎議發八難永德不能復鼎因疏言陛下  
幸察用臣不宜過聽小人妄有所改以誤國計於是  
永德言不用居二年遂以為使前使者多漁市南物  
因奏計京師持遺權貴鼎一無所市獨悉意精吏事

事無大小必出於己凡調發網吏度漕路遠近定先後為成法於是勞逸均吏不能為重輕官舟禁私載舟兵無以自給則盡盜官米為奸有能居販自贍者市人持以法不肯償所運鼎為移州縣督償之舟人有以自給不為奸而所運米未嘗不足也入為三司鹽鐵副使數與包拯爭議不少屈拯素強然無如之何遷刑部郎中天章閣待制河北都轉運使徙使河東卒鼎性廉不欺嘗任其子族人欲增年以圖速仕鼎不可父死分諸子以財鼎悉推與其弟嘗知臨邛縣轉運使選攝新繁新繁多職田斗粟不以自入奉

使契丹得千縑散之族人一日盡所至不擾唯市飲  
食日用物增直以償事繼母孝教育孤姪甚至自奉  
養儉約當官明敏強直不可撓所薦士多知名有終  
身不識者然性猜忌其行部至於藥餌皆手自扁鑷  
至路州八義館疾作不知人事左右遑遽發藥奩悉  
無題識莫敢進以迄於卒初鼎與弟豫皆有才氣好  
上書言事仁宗稱之以為豫孟浪鼎所言多可用豫  
為人不事羈檢以大理事承知伊闕縣有異政棄官  
浮游江湖間殖貨自給以卒

杜杞字儒長文鎬蔭補將作監主簿知建陽縣強敏

有才閩俗老而生子輒不舉杞使五保相察犯者得重罪累遷尚書虞部員外郎知橫州時安化蠻寇邊殺知宜州王世寧出兵討之杞言嶺南諸郡無城郭甲兵之備牧守非才橫為邕欽廉三郡咽喉地勢險阻可屯兵為援邕管內制廣源外控交趾願擇文臣識權變練達嶺外事者以為牧守使經制邊事改通判真州徙知解州權發遣度支判官盜起京西掠商鄧均房焚光化軍授京西轉運按察使居數月賊平會廣西區希範誘白崖山蠻蒙趕反有眾數千襲破環州帶溪普義鎮寧若嶺外騷然擢刑部員外郎直

集賢院廣南西路轉運按察安撫使行次真州先遣  
急遞以書諭蠻聽其自新次宜州蠻無至者杞得州  
校出獄囚脫其械使入洞說賊不聽乃勒兵攻破白  
崖黃坭九居山砦及五峒焚毀積聚斬首百餘級復  
環州賊散走希範走荔波洞杞遣使誘之趕來降杞  
謂將佐曰賊以窮感降我威不足制則恩不能懷所  
以數叛不如盡殺之乃擊牛馬為曼陀羅酒大會環  
州伏兵發誅七十餘人後三日又得希範醢之以遺  
諸蠻因老病而釋者纔百餘人御史梅摯劾殺降  
失信詔戒諭之為兩浙轉運使明年徙河北拜天章

閣待制環慶路經畧安撫使知慶州杞上言殺降者  
臣也得罪不敢辭將吏勞未錄臣未敢受命因為行  
賞蕃酋率衆千餘內附夏人以兵索酋而劫邊戶掠  
馬牛有詔責杞杞言彼違誓舉兵酋不可與因移檄  
夏人不償所掠則酋不可得既而兵亦罷去杞性强  
記博覽書傳通陰陽數術之學自言吾年四十六死  
矣一日據廁見希範與趕在前訴寃叱曰爾狂僭叛命  
法當誅尚敢訴邪未幾卒有奏議十二卷兄植以文  
雅知名累任監司終少府監弟樞亦強敏為比部員  
外郎有張彥方者温成皇后母越國夫人客也坐奸

利論死語連越國夫人開封不敢窮治執政以后故亦不復詰獄上中書遣樞慮問樞揚言將駁正亟改用諫官陳升之權倖切齒於樞前此御史中丞王舉正留百官班論張堯佐除宣徽使樞嘗出班問其故至是蓋累月矣坐是罪樞絀監衡州稅卒

楊旼字樂道保靜軍節度使重勛之曾孫進士及第授秘書省校書郎并州錄事參軍再遷大理寺丞知岳州慶曆三年湖南徭人唐和等劫掠州縣擢殿中丞提點本路刑獄專治盜賊事乃募才勇深入峒討擊然南方久不識兵士卒多畏懾及戰孤漿峒前軍

血大兵悉潰畋踣巖下藉淺草得不死卒厲衆平六  
峒以功遷太常博士未幾坐部將胡元戰死降知太  
平州歲餘賊益肆帝遣御史按視還言畋嘗戰山下  
人樂為用今欲殄賊非畋不可乃授東染院使荆湖  
南路兵馬鈐轄賊聞畋至皆恐懼踰嶺南遁又詔往  
韶連等州招安之乃約賊使出峒授田為民而轉運  
使欲授以官與貲納質使還畋曰賊剽攻湖廣七年  
所殺不可勝計今使飽貲糧據峒穴其勢不久必復  
亂明年春賊果復出陽山畋即領衆出嶺外涉夏秋  
凡十五戰賊潰畋感瘴疾歸蠻平願還舊官改尚書



屯田員外郎直史館知隨州召還為三司戶部判官  
奉使河東丁父憂會儂智高陷邕州召至都門外辭  
以喪服不敢見仁宗賜以服飾御巾入對便殿即日  
除起居舍人知諫院廣南東西路體量安撫經制賊  
盜畋至韶州會張忠戰死智高自廣州回軍沙頭將  
濟畋令蘇緘棄英州蔣偕焚糧儲及召开贇岑宗閔  
王從政退保韶州賊勢愈熾畋不能抗遂殺蔣偕王  
正倫敗陳曙復據邕州畋坐是落知諫院知鄂州再  
降為屯田員外郎知光化軍明年又降為太常博士  
歲終徙邠州復起居舍人為河東轉運使入為三司

戶部副使遷吏部員外郎奉使契丹以曾伯祖業嘗  
陷虜辭不行河北舊以土絹給軍裝三司使張方平  
易以他州絹畝既同書奏聞外議籍籍又密陳其不  
可久之擢天章閣待制兼侍讀判吏部流內銓上言  
願擇宗室之賢者使侍膳禁中為宗廟計嘉祐三年  
冬河北地震明年日食正旦復上疏曰漢成帝時日  
食地震哀平之世嫡嗣屢絕此天所以示戒也陛下  
宜早立皇嗣以答天意改知制誥李珣自防禦使遷  
觀察劉永年自團練使遷防禦畝當草制封還詞頭  
因言祖宗故事郭進戍西山董遵誨姚內斌守環慶

與強寇對壘各十餘年未嘗轉官移鎮重名器也今  
珣等無尺寸功特以外戚故除之恐非祖宗意不報  
詔他舍人草制而范鎮言朝廷如以畋言為是當罷  
珣等所遷官倘以為非乞復令畋命詞不允進龍圖  
閣直學士復知諫院嘉祐六年京師大水畋上言洪  
範五行傳簡宗廟則水不潤下又曰聽之不聰厥罰  
常水去年夏秋之交久雨傷稼澶州河決東南數路  
大水為沴陛下臨御以來容受直諫非聽之不聰也  
以孝事親非簡於宗廟也然而災異數見臣愚殆以  
為萬機之聽必有失於審者七廟之享必有失於順

者惟陛下積思而矯正之乃下其章禮官并兩制考  
議咸言南郊三聖並侑溫成皇后立廟皆違經禮於  
是詔自今南郊以太祖皇帝定配改溫成廟為祠殿  
舊制內侍十年一遷官樞密院以為僥倖乃更定歲  
數倍之畋言文臣七遷而內侍始得一磨勘為不均  
宜如文武官僚例增其歲考遂詔南班以上仍舊制  
無勞而嘗坐罪徙者即倍其年議者謂畋以士人比  
闕寺為失卒贈右諫議大夫畋出於將家折節喜學  
問為士大夫所稱在山下討蠻家問至即焚之與士  
卒同甘苦破諸峒及用之嶺南以無功斥名稱遂衰

性清介謹畏每奏事必發封數四而後上之自奉甚約為郡待客雖監司菜果數器而已及卒家無餘貲特賜黃金二百兩其後端平贈講讀官御飛白書扇遣使特賜置其柩

周湛字文淵鄧州穰人進士甲科為開州推官中身言書判改秘書省著作佐郎通判戎州俗不知醫病者以祈禳巫祝為事湛取古方書刻石教之禁為巫者自是人始用醫藥累遷尚書都官員外郎知虔州提點廣南東路刑獄初江湖民略良人鬻嶺外為奴婢湛至設方畧搜捕又聽其自陳得男女二千六百

人給飲食還其家徙京西路鄧州羨陽堰歲役工數十萬漑州縣職田而利不及民湛奏罷之為鹽鐵判官三司帳籍浩煩吏胥離析為弊欺湛為立勘同法歲減天下計帳七千為江南西路轉運使州縣簿領案牘淆混無紀次且多亡失民訴訟無所質至久不能決湛為立號以月日比次之詔下其法諸路又以徭賦不均百姓巧於避匿因條其詭名挾佃之類十二事且許民自言凡括隱戶三十萬還為戶部判官又為夔州路轉運使雲安鹽井歲賦民薪茅至破產責不已湛為蠲鹽課而省輸薪茅判鹽鐵勾院以太



度其所侵悉黜之自是無火患然豪姓不便提點刑  
獄李琦奏湛擄人徒知相州右司諫吳及疏曰湛裁  
損居民第為官也百姓侵官而主司禁之其職然也  
况聞湛明著律令約民以信乃奉法行事百姓自知  
罪不敢訴郡從事高直温夏竦子婿也竦邸店最廣  
故加諧於穆且謂湛伐木若干株昔之民居侵越官  
道木在道側既正其侵地則木在中衢固宜翦去又  
湛種楸桐千餘本課戶貯水以嚴火禁又於民居得  
衆汲舊井四廢而復興人得其利道傍之井反在民  
居之下其侵越豈不白乎望詔執政大臣辨正湛穆



字三百九十  
是非明垂獎黜若謂湛已行之命憚於追改是傷風  
敗俗貽患於後不若追改之愈也湛守大郡於湛不  
為重輕但國家舉錯有所未安奉職者將何以勸邪  
未幾卒湛為人脫易少威儀然善射弩雖隔屋亦中  
的云

徐的字公準建州建安人擢進士第補欽州軍事推  
官欽土煩鬱人多死瘡瘍的見轉運使鄭天監請曰  
徙州瀕水可無患請轉而上聞從之天監因奏留的  
使辦役的短衣持挺與役夫同勞苦築城郭立樓櫓  
以備戰守畫地居軍民為府舍倉庫溝渠廛肆之類

民皆使之遷大理寺丞知吳縣移梁山軍通判常州屬歲飢出米為糜粥以食餓者累遷尚書屯田員外郎知臨江軍擢廣南西路提點刑獄安化州蠻攻殺將吏所部卒畏誅謀欲叛的馳至宜州慰曉之曰爾曹亡懼能出力討賊猶可立功以自贖若朝叛則夕死非計也衆皆歛手聽命奏復澄海忠敢軍後皆獲其用改知舒州徙荆湖北路轉運使辰州蠻彭士義為寇的開示恩信蠻黨悔過自歸攝江陵府事城中多惡少年欲為盜輒夜縱火火一夜十數發的籍其惡少年姓名使相保任曰爾輩通相察不然皆爾

罪也火遂息太子洗馬歐陽景摺橫不法為里人害  
的發其奸竄之嶺外以兵部員外郎為淮南江浙荆  
湖制置發運副使奏通泰州海安如臯縣漕河詔未  
下的以便宜調兵夫濬治之出滯鹽三百萬計得錢  
八百萬緡遂為制置發運使軍賊王倫起山東轉掠  
淮南的團兵待之會青州改遣裨將傅永吉追殺入  
歷陽的與賞遷工部郎中復治泰州西溪河發積鹽  
加直昭文館區希範蒙趕寇衡湘命的招撫之既至  
再宿會蠻酋相繼出降三司以郊祠近宜召還計事  
既還蠻復叛除度支副使荆湖南路安撫使至桂陽

降者復衆其欽景石碇華陰水頭諸洞不降者的皆  
討平之斬其酋熊可清等千餘級卒於桂陽

論曰宋承平時書生知兵者蓋寡偕沿數上書言邊  
事策畫論議有得有失固皆一時之俊畋由將家子  
力學第進士再討獠賊前勝後敗兵家之常也杞的  
俱以征宜州蠻立功杞則殺降失信的則招徠以恩  
其優劣槩可見矣湛強敏所至有治績史稱善射抑  
亦文臣之習武事者歟鼎性孝友自奉甚約而踈於  
財居官清辨土俗有生子不舉者輒禁之獨發摘吏  
奸貽衆怒或以虎目之豈其然乎

姚仲孫字茂宗本曹南著姓曾祖仁嗣陳州商水令  
因家焉父曄舉進士第一官至著作佐郎仲孫早孤  
事母孝擢進士第補許州司理參軍民婦馮氏夫被  
殺指里胥嘗有求而其夫不應以為里胥殺之官捕  
繫辭服仲孫疑其枉知州王嗣宗怒曰若敢以身任  
之耶仲孫曰幸毋遽決與得徐辨後兩月果得殺人  
者調邢州推官徙資州轉運使檄仲孫詣富順監按  
覈獄全活數十人資州更二守皆憚老事多決於仲  
孫改大理寺丞知建昌縣初建昌運茶抵南康或露  
積于道間為霖潦所敗主吏至破產不能償仲孫為

券吏民輸山木即高阜為倉邑人利之徙通判彭州  
嘗以天下久無事不可以弛兵備因上前世禦戎料  
敵之策名防邊龜鑑通判睦州徙滁州歲旱飢有詔  
發官粟以賑民而主吏不時給仲孫既至州立劾主  
吏夜索丁籍盡給之累遷尚書屯田員外郎王巖守  
益州辟通判州事召為右司諫入內都知閻文應求  
為都知仲孫數其罪白上曰方帝齊宿太廟而文應  
叱醫官聲聞行在郭皇后暴薨中外莫不疑文應實  
毒者出文應為泰州兵馬鈐轄又稱疾留復論奏乃  
亟去以起居舍人知諫院管勾國子監以尚書戶部

員外郎兼侍御史知雜事時諫議大夫十二員仲孫  
曰諫議大夫蓋朝廷之選不宜以歲月序進今諸寺  
卿至前行即中三十五員貼近職者猶不在數若以  
年勞授則數年之外諫議大夫員益多請艱其選以  
處材望之臣餘悉次補卿監乃詔當選者奏聽旨先  
是諸路復提點刑獄還朝多擢為省府官仲孫請第  
其課為三等計黜之即詔仲孫司考課之法歷三司  
戶部度支益鐵副使進天章閣待制河北都轉運使  
大修城壘兵備仁宗賜詔褒之權知澶州河壞明公  
埽絕浮橋仲孫親總役堤上埽一夕復完權知大名

府夜領禁兵塞金堤決河是歲澶魏雖大水民不及  
患進禮部郎中龍圖閣學士徙陝西都轉運使未行  
權三司使事屬西北備邊募兵益屯及賞賜聘問之  
費不可勝計仲孫悉心經度雖病未嘗輒廢事坐小  
吏詐為文符出知蔡州因母憂喪一目卒

陳太素字仲華河南緱氏人中進士第嘗為大理評  
斷官入審刑為詳議官權大理少卿又判大理事任  
刑法二十餘年朝廷有大獄疑必召與議太素為推  
原人情以傳法意衆皆釋然自以為不及雖號明習  
法令然所論建亦或有不中每臨案牘至忘寢食大



寒暑不變子弟或止之答曰囹圄之苦豈不甚於我也歷知江陰軍兗州明州有治跡在大理耳疾數求罷執政以為任職弗許累官至尚書兵部郎中卒太素家行脩治尤喜論刑名常以為有司議法當據文直斷不可求曲曲當法曲當法所以亂也同時有馬尋者須城人舉毛詩學究累判大理寺以明習法律稱歷提點兩浙陝西刑獄廣東淮南兩浙轉運使知湖撫汝襄洪宣鄧滑八州襄州飢人或群入富家掠困粟獄吏鞫以強盜尋曰此脫死爾其情與強盜異奏得減死論著為例終司農卿又有杜魯者濮州人為

吏號知法嘗言國朝因唐大中制故殺人雖已傷未  
死已死更生皆論如已殺夫殺人者死傷人者刑先  
王不易之典律雖謀殺已傷則絞蓋甚其處心積慮  
陰致賊害爾至於故殺初無殺意湏其已死乃有殺  
名苟無殺名而用殺法則與謀殺孰辨自大中之制  
行不知殺幾何人矣請格勿用又言近世赦令殺人  
已傷未死者皆得原減非律意請傷者從律保辜法  
死限內者論如已殺勿赦皆著為令

李虛已字公受五世祖盈自光州從王潮徙閩遂家  
建安父寅有清節仕江南李氏至諸司使江南國除

授殿前承旨辭不拜時偽官皆入留京師而寅母獨  
在江南乃遣其長子歸養舉進士起家為衢州司理  
參軍母老棄官以歸虛已亦中進士第歷沈丘縣尉  
知城固縣改大理評事累遷殿中丞提舉淮南茶場  
召知榮州未行改遂州時太宗勵精政事嘗手書累  
二十餘紙曰公勤潔已奉法除奸惠愛臨民者乃可  
書為勞績月給奉以實錢命有司擇群臣以治最聞  
者賜之仍諭曰除奸之要在乎奉法不可因以生事  
時虛已被賜因獻詩自陳父子遭遇榮及祖母帝悅  
為批其紙尾曰虛已學古入官榮親事生奉書為郡

欲布新規朕得良二千石矣遂賜五品服又賜其祖母錢五十萬命翰林學士張洎會兩制三館儒臣編閱所批詔其後以南郊恩封群臣母妻虛己又請罷其妻封以授祖母詔悉封之世以為榮會遣使察川峽吏能否而州多不治唯虛己與薛顏邵曄查道數人以能任職稱再遷尚書屯田員外郎以便親請通判洪州是時寅已謝歸春秋高寅母尚無恙虛己雙輦迎侍寅至豫章樂其山水曰此可以終吾身也遂臨州之東湖築第宇以居虛己為侍御史出提點荆湖南路刑獄徙淮南轉運副使累遷兵部郎中為龍

圖閣待制歷判大理寺乂之求補外真宗稱其儒雅  
循謹特遷右諫議大夫數月出知河中府召權御史  
中丞未幾以疾辭進給事中知洪州遷尚書工部侍  
郎徙池州求分司南京卒初寅之請老年未六十虛  
已分司而歸年六十九其季虛舟仕至餘干縣令坐  
法免官不復言仕初太宗既賜虛已錢翌日以語宰  
相曰虛已詩思可嘉予錢五十緡矣宰相對以所予  
乃五十萬帝知其誤由是詔群臣以章獻者閣門勿  
受皆由中書門下閱而上之然論者謂虛已父子篤  
行家甚貧雖人主一時之誤殆天賜也寅事親孝治

家有法閨門之內肅如也虛已虛舟又以孝友清慎  
世其家虛舟之子寬為尚書金部郎中定為司農少  
卿為吏頗有能名虛已喜為詩數與同年進士曾致  
堯及其壻晏殊唱和初致堯謂曰子之詞詩雖工而  
音韻猶啞虛已未悟後得沈休文所謂前有浮聲則  
後須切響遂精於格律有雅正集十卷

張傳字巖卿唐初功臣公謹之裔祖播為亳州團練  
副使子孫因為譙人傳進士及第稍遷秘書省著作  
佐郎知奉符縣時方脩會真宮天書觀及增治岳祠  
以辦事稱賜錢二十萬宰相向敏中冊東岳帝號還

薦之知楚州會歲飢貽書發運使求貸糧不報因歎  
曰民轉死溝壑矣報可待邪乃發上供倉粟賑貸所  
活以萬計因拜章待罪詔獎之提點江西刑獄徙江  
東就除轉運使入權三司鹽鐵判官會河決濟北民  
多被害命安撫京東累遷工部郎中出為兩浙轉運  
使改荆湖北路復為鹽鐵判官再遷兵部為陝西轉  
運使徙江淮發運使未至召還屬西京奏兵食乏因  
言馮翊華陰積粟多可運二十萬石絲三門下濟之  
遂留為侍御史知雜事判吏部流內銓進三司度支  
副使以疾請外遷太常少卿知應天府逾月為右諫

議大夫徙青州遷給事中知鄆州復知應天府遂以  
工部侍郎致仕卒傳強力治事七為監司所至審覈  
簿書勾擿奸隱州縣憚之傳曰奚為我憚哉吾所以  
事事致察者正所以愛州縣也吏不敢慢則州縣不  
復犯法矣人亦以為然天禧中有術士自言數百歲  
少時嘗游秦悼王家歷見唐肅宗代宗朝由是出入  
禁中見尊重人無敢詰其僞傳見之訊以唐事術士  
語屈

俞獻卿字諫臣歛人少與兄獻可以文學知名皆中  
進士第獻可有吏稱歷吏部郎中龍圖閣待制獻卿



起家補安豐縣尉有僧貴寧積財甚厚其徒殺之詣縣給言師出遊矣獻卿曰吾與寧善不告而去豈有異乎其徒色動因執之得其所瘞尸一縣大驚再調昭州軍事推官會宜州陳進亂象州守不任事轉運使檄獻卿往佐之及至守謀棄城獻卿曰臨難苟免可乎賊至尚富力擊不勝有死而已柰何棄去初昭州積緡錢鉅萬獻卿盡用平糴至積穀數萬及是大兵至賴以饋軍改大理寺寺丞為本寺詳斷官歷知慎仁和二縣再遷太常博士知南雄州徙潮州除殿中侍御史為三司鹽鐵判官上言天下穀帛日益耗

物價日益高欲民力之不屈不可得也今天下穀帛之直比祥符初增數倍矣人皆謂稻苗未立而和糴桑葉未吐而和買自荆湖江淮間民愁無聊轉運使務刻剝以增其數歲益一歲又非時調率營造一切費用皆出於民是以物價積高而民力積困也陛下誠以景德中西北二邊通好最盛之時一歲之用較之天禧五年凡官吏之要冗財用之盈縮力役之多寡賊盜之增減較然可知其利害也况自天禧以來日侈一日又甚于前夫卮不盈者漏在下木不茂者蠹在內陛下宜知其有損於彼無益於此與公卿大

臣朝夕圖議而抃正之帝納其言為罷諸宮觀兵衛  
又命官除無名之費以鉅萬計淮浙鹽利不登命獻  
卿往經度之更立新法歲增鹽課緡錢甚衆會其兄  
為鹽鐵副使徙開封府判官朝廷擇陝西轉運使宰  
相連進數人不稱旨他日獻卿在所擬中帝曰此可  
以除陝西轉運使時邊吏多因事邀功涇原路鈐轄  
擅於武英州鑿邊壕置堡砦獻卿度必招寇患亟檄  
罷之未幾賊果至殺將士塞所鑿壕而去徙京西因  
入對甚言趙振堪將帥范仲淹明鎬可大用及條上  
邊策甚備除福建轉運使還判三司鹽鐵勾院累遷

尚書刑部郎中直史館知浙南歷戶部度支鹽鐵副  
使以右諫議大夫集賢院學士知杭州暴風江潮溢  
決堤獻卿大發卒鑿西山作堤數十里民以為便還  
勾當三班院知通進銀臺司最後知應天府以刑部  
侍郎致仕卒

陳從易字簡夫泉州晉江人進士及第為嵐州團練  
推官再調彭州軍事推官王均盜據成都連陷綿漢  
諸郡彭人謀殺兵馬都監以應之時從易攝州事斬  
其首謀者召餘黨曉以禍福貫之衆皆呼悅乃率厲  
將吏脩嚴守械戒其家僮積薪舍後曰吾力不足以

守當死於此賊聞其有備不敢入境賊平安撫使王  
欽若以狀聞召為秘書省著作佐郎大理寺詳斷官  
遷太常博士出知邵武軍預脩冊府元龜改監察御  
史真宗宴近臣崇和殿召從易預賦詩稱旨遷侍御  
史改刑部員外郎直史館知虔州會歲大飢有持杖  
盜取民穀者請一切減死論凡生者千餘人天禧中  
坐薦送別頭進士失實降工部員外郎以父老求鄉  
郡宰相寇準惡其疎已除吉州從易因對自言改福  
州未行遭父喪服除糾察在京刑獄出為湖南轉運  
使徙知荆南擢太常少卿直昭文館知廣州又坐嘗

課校太清樓書字非僞誤而從易妄判竄之降直史  
館明年復職在廣三年以清德聞入為左司郎中知  
制誥初景德後文士以雕靡相尚一時學者鄉之而  
從易獨守不變與楊大雅相厚善皆好古篤行時朝  
廷矯文章之弊故並進二人以風天下兼史館脩撰  
遷左諫議大夫命使契丹以年老辭不行又辭職請  
補郡進龍圖閣直學士知杭州卒從易好學強記為  
人激直少容喜別白是非多面折人或尤其過從易  
終不變王欽若最善之嘗謂人曰數日不見簡夫輒  
怱怱不懌及廢居南京時丁謂方用事人畏謂無敢

往見欽若者從易將使湖南欲過之遇汴水旱涸遂告謂曰從易願使湖外者非獨為貧也亦以王公在宋故就省之爾今汴涸義不可從他道進幸公許少留謂即大喜曰王公之門獨君為知我者留權糾察刑獄從易不敢當乃聽歸館須汴通乃行時寇準貶道州謂又謂從易曰廬陵之事可以釋憾矣從易對曰當以故相事之爾謂有愧色其行志多類此所著

泉山集二十卷中書制藁五卷西清奏議三卷

楊大雅字子正唐靖恭諸楊虞卿之後虞卿孫承休唐天祐初以尚書刑部員外郎為吳越國冊禮副使

楊行密據江淮道阻不克歸遂家錢塘大雅承休四世孫也錢俶歸朝挈其族寓宋州大雅素好學日誦數萬言雖飲食不釋卷進士及第歷新息鄆陵縣主簿改光祿寺丞知新昌縣徙知潯州監在京商稅再遷秘書丞咸平中交趾獻犀因奏賦召試遷太常博士久之又上書自薦獻所為文復召試直集賢院出知筠袁二州提舉開封府界諸縣鎮事為三司鹽鐵判官知越州提點淮南路刑獄還考試國子監生坐失薦迭降監陳州酒徒知常州判三司都磨勘司戶部勾院遷集賢殿脩撰知應天府還糾察在京刑獄



以兵部郎中知制誥大雅初名侃至是避真宗藩邸  
諱詔改之居二歲拜右諫議大夫集賢院學士知毫  
州卒大雅朴學自信無所阿附直集賢院二十五年  
不遷有出其後者徃徃致榮顯或笑其違世自守大  
雅嘆曰吾不學乎世而學乎聖人由是以至此吾之  
所有不敢以薦於人而嘗自獻乎天子矣天禧中使  
淮南循江按部過金陵境上遇風覆舟得傍卒拯之  
及岸冠服盡喪時丁謂鎮金陵遣人遺衣一襲大雅  
辭不受謂以為歎宰相王欽若亦不悅之晚與陳從  
易並命知制誥大雅嘗因轉對上原治十七篇所著

大隱集三十卷西垣集五卷職林二十卷兩漢博聞  
十二卷

論曰仲孫以才力自奮於時論事著效號為能吏太  
素尋曾能知法意理官之良也虛已獻卿立朝雖微  
卓犖大節及為他官所至有吏稱若從易拒釋憾之  
言大雅辭襲衣之遺卒使權奸愧歎抑又可尚哉

列傳卷第五十九

言大邦難兼本之重卒對難我與地中又下待治  
卓率大德以爲此言治至百吏備治安民引經考之  
蒸暑曾非味未惠野官之身也禮已始明立則興始  
論曰中經以古之自當新制命書者文製古而更本  
十二卷

大意書三十卷西皇書五卷海內二十卷所載創開

(B)

610

1035

[v.20]

no.87

10

35